

HUMHIZHA HWAMWARI

HWAKAZIVISWA

 Ndinokutendai, zvikuru, hama. Billy anoda kuti nditaure kuti aka ndekekutanga kangu mupurupiti, kwemwedzi mitatu. Uye iye... Ndinorangarira nguva yokutanga yandakamuita, kuti apupure, akati, "Chinhu chekutanga, ndiri kutya." Neniwo, zvakare. Anenge makore makumi matatu namashanu mushumiro, uye iyi ndiyo nguva yakarebesa yandakagara ndisiri papurupiti kubvira pandakanga ndiri mushumiro. Ndaida kuzorora zvishoma, saka Hama Mosley nen, nedzimwe hama pano, takanga tiri parwendo rwuduku rwokuvhima. Uye tazorora zvino. Zvino uno ndiwo musangano wangu wekutanga kubva ini... kunge kutanga kwaGunyana. Uye chimwe chinhu... shumiro chimwe chinhu chaunofanira kuita sekugara nacho.

² Uye zvino ndavakumbira kuti vadzime feni iyo, kana kuona kuti vangaidzima here, nekuti ndinoziva kuti zvakaoma kunzwa. Uye zvakaoma, ndinoziva, kana mumwe munhu ari kupa chapupu chake. Zvanga zvakandiomera kuti ndivanzwe. Muri kunzwa zvakanaka here zvino? Zvakanaka. Ndinoziva kuita sekumira pedyo nemaikefoni iyi kudzamara vaita kuti igadziriswe.

³ Zvirokwazvo uyu mukana mu—mukuru kwandiri, uye ndi—ndinotenda zvikuru kuna sachigaro, uye kuboka reFull Gospel Business Men muno muYuma, uye nekuvashumiri vose. Vaimbi vakanaka ava vari pano, vanga vari kumusoro kuno nguva shoma yapfuura, ndinoda kuvanzwa pa—pamusangano. Zvanga zvakanaka chaizvo. Nda—ndangofunga, pavanga vachiimba, kana Johane akandiona. Uye ndinovimba kuti akadaro. Uye, saka, ndinonzwa kuti muri murumutsiriro pano. Ishe vakuropafadzei zvikuru, hama nehanzvadzi, pamunoshumira. Uye kushamwari dzangu dzose muPhoenix nenzvimbo dzakasiyana-siyana, dziri... uye nevanobva uko kuCalifornia.

⁴ Uye ndinongoda kutaura shoko pamusoro pemapoka. Pandakauya kuvanhu vePentekosti, ndakanga... ndaive nechiitiko chepentekosti, ndisingazivi kuti kune chechi yePentekosti. Ndakanga ndiri muMissionary Baptisti panguva iyoyo. Ndainge ndagamuchira rubhabhatidzo rweMweya Mutsvene, uye ndakaona kuti paiva nevamwe vanhu vaitenda chinhu chimwe chete chandaive ndagamuchira. Uye vakanga vachgamuchira makore makumi mana ndisati ndachiwana.

Saka ndaingova mumwe, sezvakataurwa naPauro, ndinotenda, ndisiri kuedza kutaura pamwe naye, asi kuita sekunge “mumwe wakazvarwa kunze kwemwaka.” Asi ivo...Hama dzangu dzakaita sekufunga kuti ndakanga ndatsauka, sokunge kudivi rakadzika, sezvatinokudana. Asi nda—ndaiziva kuti ndaive ndagamuchira chimwe chinhu. Zvino, chiitiko changu chaive chakangofanana nechavaiva nacho ikoko. Uye ndiyo nzira yandinozvida.

⁵ Uye, asi pandakauya pakati pavo, chikamu chinogodora mo—moyo pamusoro pazvo, ndakaona kuti vakanga vakapatsanuka-patsanuka, mumasangano akasiyana-siyana, sezvakanga zvakaita chechi yangu yeBaptisti. Uye ivo... Ndakafunga kuti paingova neimwe bedzi inonzi Pentekosti, uye yaiva iyo yoga. Asi, ndakatozoona kuti, paiva nemasangano akati wandei akasiyana awo. Saka, ini...ose akanga akanaka. Ndinoziva vamwe vevarume vakaisvonakisa vandati ndambosangana navo, muhupenyu hwangu, vaive mumapoka aya. Uye vaiva—vaiva, ndizvo, masangano akasiyana. Uye pfungwa yangu—yangu yakanga iri yokuti tinofanira kuva vamwe mumwoyo, naKristu, uye handina kumbojoinha chero rimwe sangano ravo. Ndakangogara pakati pavo, uye ndichiedza kubata maoko maviri, nemaoko ese, ndoti, “Tiri hama.” Hati... Tinogona kuona zvinhu zvidiki zvakasiyana kubva kune mumwe, kubva kune mumwe. Asi, kunze kwaizvozvo zvose, tichiri hama, nokuti takazvarwa noMweya mumwe chete. Tiri mhuri yaMwari.

⁶ Zvino apo veChristian businessmen, veFull Gospel Business Men, boka rino, ndaivemo mumisangano yekutanga naHama Shakarian. Ndakavaziva pasati pava nessangano, kana kuti bato rakanangwa. Ndakafunga kuti chaiva chinhu chikuru. Uye wainge uri mukova wakazaruka kwandiri, kufamba pasi rose neveFull Gospel Business Men ava.

⁷ Apo, dzimwe nguva, paunowana boka revashumiri, dzimwe nguva, vanova nemanzwiro madiki anopesana nerimwe boka, nokuti mumwe munhu akataura chimwe chinhu. Hazvisi kwese, asi tinozviwana kwatinenge tichibva. Uye sekuti, kana imwe chechi ichizovtsigira nemari, imwe yacho haizovi nechekuita nazvo.

⁸ Asi neveFull Gospel Business Men, ranga riri suwo rakazaruka kwandiri. Pavanopinda, ipapo ndinobva ndaunganidza hama dzangu dzose pamwe chete, uye ti—tinogona kuwadzana; pamwe vafundisi vaviri vanogona kunge vanga vaine munzwiro, kana chimwe chinhu. Iri rakave suwo guru rakazaruka, uye ndafamba kunyika dzokunze nokuda kwavo zvino kwemakore, ndichituraum mumapoka avo.

⁹ Uye ini... Yuma harisi guta rakakura kwazvo, kunyangwe ndichifunga kuti yakakura kudarika iro kwandinobva,

Jeffersonville, Indiana. Asi ndasangana nasachigaro wenu pano. Iye...anga...nevakasiyana-siyana veboka renyu. Uye ndinofunga kuti makawana mukana wakanaka pano.

¹⁰ Ndanga ndichingofunga, manheru ano, ndakagara pano ndokutarisva vanhu. Munoziva, nenguva isipi tichapererwa nemukana uyu. Mubatanidzwa wemaChechi ePasi Rose nekukurumidza uchatimedza. Ndinfungidzira kuti vazhinji vevateereri vangu manheru ano vanosanganisira maPentekosti, nemaBaptisti, ne—neChurch of God, neavo vari kunze kweMubatanidzwa iwoyo wemaChechi ePasi Rose. Uye—uye ivo, ndizvo chaizvo zvavakashanda pazviri, uye ndizvo zvakataurwa neBhaibheri kuti vaizoita. Uye isu tinoyambirwa nezvazvo, saka ngatigarirei kure nazvo. Uye saka sepazvanga zviri kutaura manheru ano nezvazvo, murwiyo, nezveKuuya kwaShe kwave pedyo, kunogona kuva pedyo kupfuura zvatinofunga kuti kuri.

¹¹ Uye ndinofunga ndipo apo patinogona kusangana nemhando ino yekuyanana, zvinoita chimwe chinhu kватiri, chinotiswededa pedyo mumwe nomumwe. Uye patinoswedera pedyo mumwe nemumwe, tinoswederawo pedyo naMwari, nokuti Jesu akati, “Sezvamakaitira kune mudukusa wevaduku vaNgu ava, mazviitira iNi.”

¹² Ndine mukomana mudiki muno pane imwe nzvimbo, ndinodaira kudaro, Joseph. Ndina Billy akagara apa. Vanasikana vaviri vagere kumashure uko, nemudzimai. Zvino kana chero munhu aive nechimwe chinhu chaive... chawaida kuita chakanaka kwazvo, Ndingasva hangu ndada kuti uchiitire kuvana vangu pane kuti undiitire ini. Uye saka ndinonzwa zvichida, semubereki, uye ndiYe chitubu chehubereki, ndinofunga kuti ndiwo manzwiro anoita Mwari. Kana tichifanira...TinoVashumira apo patinoshumiran. Ndiko kushumira kwaitinoita Mwari.

¹³ Uye tichiziva kuti ichi ichokwadi, zvino ndinofunga kuti pese panosangana boka rino, nekuti ronomira richisanganisira machechi evhangeri...Hapana chaizvoizvo imwe dzidziso inomiririrwa neFull Gospel Business Men. Vanongomiririra Vhangeri rakazara. Uye kana munhu akapesana, zvakakanisa chose. Zvakanaka. Tine kuyanana, zvakadaro. Saka ndinofunga kuti zvingave...Dai ndaigara muno muguta rino, ndinotenda, panosangana boka iroro, dai paive neimwe nzira inogoneka zvachose, ndaizovako uye ndoita kuti munhu wese ange ari ikoko wandaigona kuendesako. Ndizvozvo, nokuti chi—chinhu chinotisimbisa pamwe chete.

¹⁴ Ndinogara kuTucson, uye ndinogara ndichitaura muboka iroro, nguva dzose. Uye nekuPhoenix, kubvira pandakatamira kuArizona, ndiri kuPhoenix nguva yese yandinowana mukana wekubva uye ndoenda ku—kuPhoenix, nokuti...ndoedza

kuunza mumwe munhu pamwe nenii, kukoka mumwe munhu, kutora vamwe vashumiri.

Zvino voti, “Saka, saka, munoona, Hama Branham, hatidaro.”

¹⁵ Ndinoti, “Hazvina basa kuti imi...Hatingoendai pamwe chete nenii. Woenda sesha—shamwari, nenii.”

¹⁶ Uye wongovaendesa ikoko kwechinguva chiduku. Ndizv zvoga zvaunofanira kuita. Uye vanozoona kuti, moyo wemunhu wose une nzara yekuyanana. Uye tinofanira kunge tichiita nenzira iyoyo. Chiratidzo chikuru chenguva yekupedzisira. Mwari varopafadze boka rino. Ngari—ngarivepo kusvika Ishe Jesu vauya kuzotigamuchira kumusoro muKubwinya, ndiwo munamato wangu.

¹⁷ Zvino, ndinorangarira rwendo rwangu rwokutanga kupfuura nemuYuma. Ndainge ndiri muModel-T Ford yaigona kuita mamaira makumi matatu paawa. Ndanga ndichifunga pandanga ndichityaira ndichipinda nhasi. Ndichiri ndakatendeka kuFord; ndichiri neimwe, uye ndakanga ndisina imwezve kunze kweiyoyo. Asi ini...Zvino, handitengesi maFord. Zvino, uku hakusi kungoshingirira chete. Maona? Asi ndinorangarira kuti Ford iyoyo...Vazhinji venyu hama dzingava dzezera rangu munorangarira Model T yakare. Makanga muri muna 1927. Waifanira kutonyatsotarisisa zvakanaka chaizvo kana kuti waisazowana Yuma pawaipfuura. Yakanga iri diki kwazvo, zvino makura zvechokwadi. Asi, mawaniro andaiita mamaira makumi matatu paawa kubva muFord yangu, yaifamba mamaira gumi nemashanu paawa nenzira *iyi*, gumi nemashanu nenzira *iyi*. Saka, mukaabatanidza, ndaive nemamaira makumi matatu paawa, nekubhambabhabba kwangu kose nezvimwe zvakadaro. Yuma yakura.

¹⁸ Chechi ino inobwinya, iyo, yatiri—yatiri kurwira Kutenda kunoshamisa uku.

¹⁹ Maita henyu, hama, chero aita izvozvo.

²⁰ Yakurawo, zvakare, uye tinotenda nokuda kwazvo. Ishe vakuropafadzei mose.

²¹ Tinovimba, kana muri kuno, pedyo, chero wemisangano *iyi*...Ndine bo—boka paPhoenix, rekutaura kwariri, Svondo inouya. Uye Svondo inotevera paFlagstaff. Uye Muvhuro unotevera, zuva rechimakumi maviri nerimwe, pane mabiko ari kuTucson. Imi mose muri kukokwa.

²² Uye, Ishe vachitendera, ndinoda kutaura mukamuri yemitambo yepaWestward Ho Hotel, ndinotenda kudaro. Unotanga husiku hupi? [Mumwe munhu anoti, “ISvondo masikati, zuva regumi nemanomwe.”—Mupepetil] Svondo masikati, zuva regumi nemanomwe, ingori shumiro duku chete yekuvhangera. Ndinovimba kuti vaimbi ava varipo, pedyo

nenguva iyoyo, kuti vatibatsire. Uye tichange tiriko zvino kusvika Chitatu. Ndinofunga iSvondo masikati. Uye tinozviita nekuti hatizokanganisi chero hurongwa hwemachechi. Zvino, Muvhuro neChipiri, uyezve Chitatu tiri paRa-... Kumadokero-... Ramada Inn, Ramada Inn. Uye zvadaro neChina tinotanga paWestward Ho. Ndizvo here?

²³ [Imwe hama inoti, “Westward Ho, Svondo, Muvhuro, Chipiri. Tobva taenda kuRamada Inn, Chitatu, uye togara ikoko kusvikira konivhenisheni.”—Mupepeti] Konivhenisheni yapera, paRamada Inn. Saka tichafara kuva nemi chero nguva.

²⁴ Zvino, tisati tavrura Bhuku iri, ngatikotamisei musoro wedu kwekanguva tigotaura neMunyori.

²⁵ Zvino, nemisoro yedu yakakotamiswa kuguruva kwatakatorwa naMwari, uye, kana Jesu akanonoka, tinofanira kudzokera nenzira iyoyo rimwe zuva. Kungobva zvandanga ndiri pano, ndagamuchira shoko kubva kumabvazuva, kuti mumwe mudzimai mudiki wandaiziva... Ndiye musikana mudiki anonzi Edith Wright. Aenda kunosangana naMwari, masikati ano, nathree o'clock. Tinofanira kudzokera. Kana paine mumwe zvake pano angade kurangarirwa mumunamato, haungangosimudza ruoko rwako kuna Mwari here. Mwari vakuropafadzei.

²⁶ Baba voKudenga, sezvatafadzwa nekuwadzana kwakanaka uku, tichiimba, oo, kufadza kwazvaita moyo wangu pandanzwa rwiyo rwuya, *Johane Akandionawo Here?* Baba, ndinovimba kuti tese tichange tiripo, mumwe nemumwe wedu. Uye takotamira zvino kuguruva, uye isu—isu tinonamata kuti Mugamuchire kutenda kwedu—kwedu, nekutendeuka kwedu, nemunamato wedu kune mumwe nemumwe.

²⁷ Uye zvino tinotendeukira kuShoko reNyu, chikamu chakayereswa chemusangano chinoita sechakayereswa kupfuura—kupfuura zvime zvose, nekuti tinoziva kuti panguva ino tiri kushanda nevanhu, kuvatungamirira kuChokwadi, kuna Kristu nekuShoko, ranova Kristu. Uye tinonamata kuti Mugotizarurira Shoko. Isu—isu hatina kukwana, Ishe, asi Makazvikwanira muna zvose. Saka ndinokumbira kuti Muropafadze kushingaira kwedu kune hutera, uye dai isu manheru ano tikaziviwanu isu pachedu nenzvimbo yedu muShoko raMwari. Zviitei, Baba. Uye tichaKupai rumbidzo, nokuti tazvikumbira muZita raJesu. Ameni.

²⁸ Zvino, izvi zvakanaka chaizvo kuva pano. Ndine zvinyorwa zvishoma pano zvandafunga kuti nditaure nezvavzo, kwemaminitsi mashoma, sezvo handifungiri kuti tinobvumirwa kuramba tiri muhoro ino kwenguva yakarebesa manheru. Uye ndakaita sekungewo, zvakare, pakati pevanhu vePentekosti, ndinoita sekunonokera, munoziva.

²⁹ Ndinorangarira. Ndakambokuudzai, zvichida. Pandakatanga kuona mushumiri wePentekosti, aiva Mufundisi Robert Daugherty wekuSt. Louis. Handifungi kana chero ani wenyu aivaziva. Makaona chapupu chemwanasikana wavo mudiki mubhuku. Vakanga vari—vakanga vari... Akapodzwa St. Vitus dance, uye vakange vamutadzirira. Zvino ndiko kusangana kwandakaita nevanhu vePentekosti vekutanga.

³⁰ Uye, izvi, ndakaenda kunovanzwa vachiparidza, uye—uye, ini zvangu, va—vaigona kuparidza. Vaiita... Vaisatombomirira chero chinhu. Zvino vaiparidza kusvika vapererwa nemweya, zvino vaiita bhuruu kumeso, uye mabvi avo airovana pamwe chete, votopotsa varovera pasi. Zvino vaizotanga kufema, waivanzwa kwakaperera guta zasi uko, potse, vodzoka vachiparidza. Uye ndakafunga, “Ini zvangu, ini—ini handikwanise kungozvifunga nekukurumidza zvakadaro.”

³¹ Ndinotongofanira kuita sekutora nguva yangu. Ndinoita sekuti nonokei, uye ndave kuchemberawo, zvakare, munoziva, ndichienda zvishoma nezvishoma hangu, saka ndinovimba muchatsungirira neni kwemaminitsi mashoma.

³² Pane chinhu chimwe chete chechokwadi, chandinoziva kuti hachikundikane, zvino ndiro Shoko raVo. “Denga nenika zvichapfuura, asi Shoko raVo haringakundiki.” Saka ngativhurei zvino, kana mune Bhaibheri renyu, uye muchida kuverenga kubva maRiri, muBhuku raIsaya, chitsauko 53 chaIsaya. Ndinoda kuverenga izvi kuti ndivake, ndiwane musoro wenuya wekuvaka chidzidzo pauri, kwechinguva.

Ndianiko wakatenda huchapupu hwedu?... ruoko rwaJEHOVHA rwakazarurirwa kuna ani?

Nekuti achakura pamberi pake sebukira nyoro, uye somudzi unobuda pavhu rakaoma: haana chimiro kana runako; uye kana tichimuona, hapana runako kuti timude.

Akazvidzwa uye akarambwa navanhu; munhu wekuswa,... wakaziva kurwadziwa: uye takaita sokuavavanzira zviso zvedu; akazvidzwa, uye hatina kumukudza.

Zvirokwazvo akatakura marwadzo edu, nokutakura kusuwa kwedu; asi isu takamucherechedza akakuvaldzwa, akarohwa naMwari, nokutambudzwa.

Asi akakuvaldzwa nokuda kwokudarika kwedu, akaiswa maronda nokuda kwekusurama kwedu: kurohwa kwakativigira rugare rwedu kwakanga kuri pamusoro pake;... namavanga ake takaporeswa.

Isu tose samakwai takanga takarasika; takatsauka mumwe nomumwe nenzira yake; uye JEHOVHA... akaisa pamusoro pake kusarurama kwedu tose.

Akamanikidza, uye akatambudzwa, kunyange zvakadaro haana kuzarura muromo wake: akaunzwa segwayana rinoiswa kundobayiwa, uye segwai pamberi pavaveuri varo akanyarara, . . . haana kuvhura muromo wake.

Akabviswa mutirongo uye nokutongwa: zvino ndianiko uchazivisa chizvarwa chake? nekuti akagurwa akabviswa panyika yavapenyu: uye nokuda . . . kudarika kwavanhu vangu.

Akaita bwiro rake pamwe chete navakaipa, navapfumi pakufa kwake; nekuti haana kuita mhirizhonga, kunyengera hakuna kuwanikwa mumuromo make.

Asi zvakafadza JEHOVHA kuti amukuvalze; akamuisa pakurwadziswa: kana waita mwuya wake uve chipiriso chevvivi, achaona zvibereko zvake, uye achawedzera mazuva ake, uye mufaro waJEHOVHA uchabudirira mamaoko ake.

Acha—Achaona zvaakatamburira nomweya wake, uye achagutswa: nokuziva kwake muranda wangu akarurama acharuramisira vazhinji; nekuti uchatakura kusururama kwavo.

Naizvozvo ndichamugovera mugove wavakuru, uye achagoverana zvakapambwa navane simba; nokuti iye . . . akadurura mwuya wake kusvika pakufa: uye akaverengwa pamwe chete navadariki; uye akatakura zvivi zvezavzhinji, uye akareverera vadarki.

³³ Ndinoda kutaura izvi, sechidzidzo chidiki. Ndinoda kutora musoro wenyaya kubva ipapo, sekuti: *Humhizha HwaMwari Hwakaziviswa*.

³⁴ Zvino, iri haringava gwa—gwa—gwaro chairo rekuverenga, rokusrudza humhizha. Asi kana tikazvitarisa, sekufunga kwatingaita, zvingave zvimwe hazvo zvese kunze kwehumhizha, nekuti rakati, “Takavanza zviso zvedu kubva kwaAri, uye pakanga pasina runako rwekuti tiMushuvire.” Uye nguva zhinji, chatingati humhizha, ipapo Mwari vanenge vasina nechekuita nazvo. Nekuti, huchenjeri hwemunhu hupenzi kuna Mwari, asi hupenzi hwaMwari hwakachenjera kupfuura huchenjeri hwose hwemunhu.

³⁵ Uye tinoona muno, kuti Mwari vatipa mufananidzo wechimwe chinhu. Ndinoda kuedza kuunza mufananidzo uyu pamberi pedu, ndichicherechedza kuti inogona kunge iri nguva yekupedzisira yekuti vamwe vedu tizosangana pamwe chete. Tinogona kusazomboonana zvakare sezvatiri zvino. Naizvozvo, kana takaungana nekuda kwechinangwa chino, kwete kuti tioneckwe kana kunzwikwa . . .

³⁶ Asi tava nekuyanana kwedu mumwe nemumwe sekupa chikafu chakaisvonaka ichi kwataita manheru ano, patafura, apo tanga tichidyisa mitumbi yedu yepanyama, uye zvino tinoda kuti Mwari vadyise mweya wedu neMana yaVo yakavanzika. Yevaprisita voga avo vakapinda munzvimbo Tsvene-tsvene ndivo vanobvumirwa kudya Chikafu chaVo.

³⁷ Uye kana tacherechedza, manheru ano, nyama yedu—yedu yemombe, Handitendi kuti ndakambova nema—mabiko nazvino, munzvimbo dzose dzandakaitira misangano, semanheru ano, kuti ndave nenhindi yakanaka yenyama yemombe seyavapakura manheru ano. Zvino, munnoona, nokuti taifanira kuva neizvozvi; kana tichirarama, chimwe chinhu chaitofanira kufa kuti tigokwanisa kunakidzwa nenguva ino yekuyanana, uye nekuraramisa hupenyu hwedu.

³⁸ Ndakanga ndichitura nemumwe murume aidya miriwo bedzi, kasiri kare, zvino akati kwandiri, “Saka, ini—ini handibvumirani nemi.” Saka, a—akaita sekundipa tsamba, aida kuonana neni tiri tega. Uye akati, “Hama Branham, ndinogara ndichikuonai semurume mutsvene.” Akati, “Asi pandakanzwa muchiti makadya hamu nemazai pakudya kwemangwanani,” akati, “izvozvo—izvozvo zvakandideredza.”

³⁹ Saka, izvozvo, handingaise chigumbuso munzira yake. Zvino, ndiyo nzira yakewo yekutenda. Asi ndakati, “Saka, changamire, kana ndikasadya, handirarame.”

⁴⁰ Akati, “Asi, munnoona, makatozodya nguruve, ne—nekuuraya huku.”

⁴¹ Ndiyati, “Changamire, tinorarama chete nezvinhu zvakafa. Handina basa nezvaunodya. Unodya muriwo. Unodya. Ukadya chingwa, gorosi rakafa. Kana ukadya chibage, chibage chakafa. Kana ukadya bhinzi, bhinzi rakafa.”

⁴² Chero chaunodya, unogona chete kurarama panyama nekuti pane chimwe chinhu chakafa kuti urarame. Zvino, chero chaunoita, kana kunyangwe kumwa mukaka, hutachiona, chero chii, unofanira kurarama nezvinhu zvakafa. Uye zvinoratidza chete, kuti kana tichifanira kurarama hupenyu hwepanyama huno, uye tinokwanisa kuzviita chete nechinhu chakafa, chimwe chinhu chakatofa kuti tigorarama Nokusingaperi. NdiJesu Kristu, uyo Mwari vakatipa semubhadharo werudzikinuro.

⁴³ Uye zvino, pandakatanga kusangana nevanhu vechiPentekosti, nda—ndakaenda kuCalifornia, ringori dunhu rakabatana nekuno, mhiri kwerwizi. Zvino ndakanga ndiri kuLos Angeles. Handina kumborarama mumazuva emushumiri wechidzimai uyu ane mukurumbira, Mai Semple...Aimee Semple McPherson. Ndakasangana nemwanakomana wavo, Rolf, murume akanaka weChikristu, ne—nemudzimai wake nemhuri yake. Zvirokwazvo vanhu vakana, naChiremba Teeford uye nevazhinji vevashandi vepaAngelus Temple. Zvino

ndakaparidza Jubheri remaPentekosti, Jubheri ramakore makumi mashanu ikoko, makore mashoma apfuura, uye zvirokwazvo takava nenguva yakanaka.

⁴⁴ Saka mukuremekedza mudzimai uyu akapa muenzaniso sezvaakaika, wekuedza nepaaigona napo pose, uye neku—kuratidza zvaiva mumwoyo make, ndakamupa ruremekedzo nekuenda kuguva rake kumusoro kuForest Lawn. Uye ndakamira ipapo ndakabvisa ngowani yangu, uye—uye ndikakotamisa musoro wangu ndikatenda Mwari nekuda kwehupenyu hwakanaka hwemurandakadzi mudiki uyu, Ndakazokumbirwa neboka randaiive naro, boka revashumiri, kana ndaizotora rwendo kupfuura nemu... kuitira vose nemuForest Lawn. Uye mukati memochari imomo, kana chero zyamunomudaidza, ndaive ndakatarisa magadzirirwo ezvinhu akasiyana-siyana, ndokuona Kudya Kwemanheru kwaShe, ndokumira. Vazhinji venyu makazvicherechedza, pavanoisa zviedza pachiri, Kudya Kwemanheru Kwokupedzisira, uye makanzwa nyaya yacho.

⁴⁵ Asi chimwe chezvinhu chakatsaurwa chandakaona ikoko, chaive paunenge uchipinda pamukova, ndinodaira kuti chinenge chiri kurutivi rwekumabvazuva. Paiva nechi—chivezwa chaMosesi chakagara ipapo, ndiyo yaive korona yehupenyu hwebasa raMichelangelo, Ndinotenda kuti ndiye, muvezi kuti... Ndinogona kunge ndiri kukanganisa pamusoro pemurume wacho, ndinotenda kuti ndizvozvo, Michelangelo, kuti—kuti... muvezi mukuru akaumba ichi, kana, mufananidzo waMosesi. Zvino paainge achizvitsanangura, mu—mutungamiri ainge achienda nesu achitiratidza, akati ndiwo waive humwe wehumhizha hukurusa hwakati hwamboitwa naMichelangelo. Uye akati zvakatora chikamu chikuru chehupenyu hwake, achishanda nesimba.

⁴⁶ Zvino ndakacherechedza, ndinotenda paive ipapo, paibvi rokurudyi. Chivezwa chacho chaitaridzika zvakakwana, chakakwenenzverwa, uye naMosesi aine hwendefa yemirairo muruoko rwake, nendebvu dzake refu. Uye kwaiva, hongu, maonero epfungwa aMichelangelo, ekuti Mosesi aifanira kunge achitaridzika sei. Zvimwe akanga asina kumboona mufananidzo, asi, mupfungwa dzake pachake, akagadzira zvaafunga kuti Mosesi aifanira kutaridzika.

⁴⁷ Uye nyaya yacho inoti, paakangobva kупедзиса chi—chivezwa chacho, uye zvese zvakwenenzverwa uye zvakakwana, akamira shure kuti aone basa rake. Zvino paakafemerwa kwazvo, kusvikira chaitaridzika zvakanyanya... Zvaaiive nazvo mupfungwa dzake, ainge azvigadzira neruoko rwake. Chaitaridzika chaizvo saizvozvo, uye makore ese aainge akamirira pachiri, kusvikira akabatwa zvikuru nekufemera, akachiroya paibvi ndokudanidzira, “Taura!” Zvino pane nzvimbo yakatekenuka pa—pa—pagumbo, ibvi raMosesi, apo

Michelangelo akarova nenyundo yake, nokuti akanga afemerwa zvikuru.

⁴⁸ Munoona, maiva nechimwe chinhu maari, pakutanga, kuti akagadzira mufananidzo wemupfungwa wezvaifunga kuti Mosesi aifanira kunge achitaridzika sei. Uye paakazviona zvichiratidzwa pamberi pake, chinhu chaicho chaaive nacho mupfungwa dzake, zvaifunga kuti Mosesi aifanira kunge achitaridzika; uye akatakura chiratidzo ichocho pamwe naye kwemakore nemakore ese iwayo, paakatora chimedu chikuru chegirenaiti, uye ndokutekenura chimedu pano nechimedu apo, achichinyora, nokuti chaifanira kubuda zvakakwana. Zvino pachakakwaniswa pamberi pake, a—akaona mufananidzo wezvaive mupfungwa dzake. Ndizvo zvakamufemera kudaro, kuti arove chivezwa, uye agodanidzira kuti, “Taura!” Makore ake ose ekushanda zvakaoma akanga abhadhara. Basa rekubata kwake guru rakanga rapera.

⁴⁹ Zvino tinozviona, zvino nda—ndakafemerwa nazvo, nokuti ndakafunga kuti, chaizvoizvo, chivanga chaise pagumbo, ndicho chakachiita, kwandiri hangu, humhizha. Nokuti, tongoti, dai wanga uri mumwe mufananidzo, kana chimwewo chinhu chaMosesi, imwe mhando yechimiro chekuti ico mumwe munhu aiva nemafungiro. Asi, murume akanga achiita basa racho, zvakamugutsa zvikuru kusvikira achirova. Uye chivanga chiri pachiri chakachiita humhizha kwandiri, nokuti chainyatsoratidza zvakakwana zvaiva zviri mupfungwa dzake kuti Mosesi anofanira kutaridzika sei.

⁵⁰ Oo, ndakamira ipapo. Ndakatozofamba ndichibvapo kwemaminitsi mashoma, kuti ndifunge nezve—nezve izvo zvazvaifanira kunge zvaireva kwaari, uye—uye nevvazvaireva kwandiri panguva iyoyo. Zvino zvakauya mupfungwa dzangu, pamusoro peizvi zvandinoda kutaura kwamuri nevvazvo.

⁵¹ Ngatibvisei zvino pfungwa dzedu kubva kuna Michelangelo, toisa kune Muvezi mukuru, Mwari Samasimba, Avo, pamavambo, kusati kwave nezuva kana mambakwedza, pasati pava neatomu kana molecule, Mwari, mupfungwa dzaVo, vaiva nemunhu, kuti munhu anofanira kutaridzika sei, zvaanofanira kuva, nezvaanofanira kuita. Uye Vaida kuti munhu iyeye ave chikamu chaVo, “Saka Vakasika munhu nomufananidzo waVo pachavo, uye nemufananidzo waMwari Vakasika munhu,” oo, apo Mwari, pamavambo, vakagadzira humhizha uhwu, chimwe chinhu chairatidza pfungwa dzaVo.

⁵² Rangarirai, kunongova nemhando imwe chete yeHupenyu Husingaperi, uye edu...kunyangwe mazita edu nepfungwa dzedu zvaiva kuna Mwari nyika isati yavambwa. Nokuti zvino tine Hupenyu Husingaperi. Uye kuti tive izvozvo, tinofanira kuva chikamu chaMwari. Saka tinofanira kunge tiri mupfungwa dzaVo, nokuti tine Hupenyu Husingaperi,

uye takatemerwa kuhupenyu huno. "Uye mazita edu akaiswa muBhuku reHupenyu reGwayana nyika isati yavambwa," maererano naZvakazarurwa. Zvino, nokuti Mwari vakava nesu mukufunga kwaVo, zvino tava neHupenyu Husingaperi, nokuti zvino Vakatitaura, uye tikabva tavapo. Zvino shoko rinongova pfungwa yaratidzwa. Mwari vakava nesu, pamavambo, mupfungwa dzaVo.

⁵³ Zvino, uye paVakasika Adhamu, munhu uya wokutanga, zvakanga zvakakwana kwazvo. Akanga akafanana naMwari. Mwari, Mweya Mutsvene mukuru, wakavhumbbamira pamusoro penyika, uye iVo...shiri ndokubuda, pamwe, nemhuka, zvinhu zvakasiyana-siyana, uye zvikaramba zvichiwedzera kuuya zviri muchimiro cheUyo akanga achivhumbbamira. Kusvikira, pakupedzisira, pakabuda rudzi rwakafanana chaizvoizvo neUyo akanga achivhumbbamira, Mwari. Mwari vaiva, kana kuti, munhu akasikwa nomufananidzo waMwari. Ipapo, paVakamuisa mubindu guru iri, saMichelangelo akaisa basa rake guru rehupenyu hwake, nevavezi vakuru vese, Mwari vakaisa basa raVo remaoko mubindu reEdheni, vakamugadzirira mubatsiri. Kwaiva kugutsikana ku—ku—kuzere kwakadini kuna Mwari, kusvikira naiVo vakazorora. Paingova pakuzorora. Basa raVo rakanga rapera.

Zvino ndokubva nyaya inosuwisa yauya, yemuvengi.

⁵⁴ Zvino cherechedzai. Chinhu chimwe chete ichi chandinoda kuti muise mundangariro, kuti Mwari vakapa murume uyu chengetedzo. Vakamupa... Vakamuchengetedza mukati meShoko raVo, nokuti Vakavaudza zvavaikwanisa kuita, zvavaisafanira kuita.

⁵⁵ Uye ndihwo hwaro humwe chete hwatakaiswa pahuri nhasi uno, zvatinogona kuita, zvatasingafanire kuita. Zvisinei nokuti takanaka sei, kuti tinoenda kuchechi zvakadii, kana kuita izvi, tinofanira kuzvarwa patsva. Maona? Zvinofanira kudaro.

⁵⁶ Uye Mwari vakaudza Adhamu zvaaignona kuita nezvaaaisafanira kuita. Vakamuisa kuseri kweShoko raVo.

⁵⁷ Ndokubva muvengi apinda, nekunyengera, ndokukambaira nemumadziro eShoko raMwari, nokuti suwo rakanga rakazarurwa kwaari, zvino akasvibisa chivezwa ichocco, kuchivi. Ndiyo imwe yenaya dzinonyanyisa kusiririsa.

⁵⁸ Kufunga, kuti munhu akaitwa ari mumufananidzo woMusiki wake, uye akapiwa rusvingo rwokuti amire seri kwarwo, kuti Shoko iroro rirege kukundika. Ndiyo—ndiyo tariro yeMukristu. Ndiyo nhowo yake—yake. Ndido nhumbi dzake dzokurwa nadzo. Ndiro dombo rake nhasi, ndiko kuti, gara seri kweShoko; mutendi wose.

⁵⁹ Zvino, haufanirwe kubva seri kwaRo. Paunodaro, iwe, uri kuvhurira musuwo kumuvenyi, pavanoti, "Oo, saka, unogona kuita zvishoma zveizvi, nezvishoma zveizvo." Mwari vanoda

kuti uzvipatsanure kubva kune chinhu chese chinonzi chivi. Wakatsauriwa Ivo zvizere, uye Ivo chete.

⁶⁰ Vane chinangwa muupenyu hwako, munhu mumwe nomumwe, chokuti hapana mumwe munhu ari panyika pano anogona kutora nzvimbo yako. Mwari vane chimwe chinhu chako. Wakagadzirwa saizvozvo. Wakaitwa nenzira iyoyo nechinangwa. Mwari vanozvitongera pabasa raVo. Ivo kunyangwe... Zvihu zvakasiyana. Tinosiyana, mumwe kubva kune mumwe.

⁶¹ Tinocherechedza muhupenyu hwemhuka. Tinoona kuti, muhupenyu hwemhuka, pane mhuka imwe chete, Mwari yavakaita mhuka inotakura mutoro, sebhiza, uye—uye rinofanira kushanda. Uye mhou chibayiro. Zvino, asi, shu—shumba neingwe zvinofamba-famba musango zvisina kana mutoro webasa kana chimwe chinhu. Vakagadzira mhuka hombe huru senzou, uyezve vakagadzira kamuchinda kadiki-diki sembeva. Zvino, ndiani aripo kuti audze Mwari zvokuita uye nemaitirwo azvo? Vanozviita nenzira yaVo Voga.

⁶² Uye Vanogadzira makomo. Vanogadzira magwenga. Vanogadzira ma—makungwa. Vanogadzira mapani. Vanogadzira rumwe rudzi rwomuti, muti wakaomarara, muchindwe, ne—nemimwe yakadaro. Vanozviita.

⁶³ Vanogadzira vanhu vakasiyana. Vanotipa, mumwe nomumwe, nzvimbo yakasiyana. Uye muti wemuchindwe haungambove muhickory. Muti wemuhickory haungambove muchindwe. Hapana munhu anogona kutora nzvimbo yako, uye haufanire kuedza kutora nzvimbo yemumwewo munhu. Nokuti, uri dungamunhu, kuna Mwari, uye Mwari vane chinangwa newe. Vakakugadzira saizvozvo. Unoti, “Sei Vakadaro?” Vanozvitongera. Vane chikonzero chekuti zvive nenzira iyoyo.

Asi tinoona kuti tese takarindwa neShoko.

⁶⁴ Muchadenga, tinotarisa mitumbi yokudenga. Bhaibheri rinoti kunyange nyeredzi imwe yakasiyana neimwe. Kuna Sirius nedzimwe dzakasiyana. NaMars naJupiter, dzose idzodzo dzakasiyana, dzakasiyana imwe kubva kune neimwe. Zuva rakasiyana nemwedzi, uye mwedzi nenyeredzi. Uye kune Ngirozi, sedzokuti, kune maSerafimi nemaKerubhi, neNgirozi neNgirozi huru, mu—muzviyero. Uye kunyange munyika itsva iri kuuya, madzimambo enyika anounza rukudzo rwavo muguta.

⁶⁵ Tichagara takadaro. Nekuti, Mwari havasi Sears and Roebuck Harmony House. NdiMwari vezvihu zvakasiyana-siyana. Vanogadzira mumwe neimwe nzira, uye mumwe neimwewo. Asi tinofanira kuVashumira nenzira iyo Mwari vakatisika nayo, uye tofara, uye togara seri kweShoko raVo. Uye ndiyo nzira iyo Mwari vakazviita nayo.

⁶⁶ Asi patinoona kuti muvengi akapinda achipfuura nemuShoko iroro, kune iri, basa rekubata kwaMwari,

akarikanganisa. Uye ndizvo chaizvo zvaari kuita zvino. Ari kuverevedza nemubasa iroro, muvengi ari kudaro, achiedza kutigadzira Mubatanidzwa wemaChechi ePasi Rose. Uye munhu ane... Handiti, munhu haatombogoni kubvumirana nemumwe, ko tichazviita sei kuti pasi rose ribvumirane nemunhu? Uye pamunongoita izvozvo...

⁶⁷ Tine Mumwe watinofanira kugara tichibvumirana naye, ndiye Mwari. "Zvino Pakutanga Shoko rakanga riripo, zvino Shoko rakanga riri kuna Mwari, uye Shoko rakanga riri Mwari." Zvino Shoko rinoramba riri Mwari, uye richagara riri Mwari, nokuti Mwari vari muShoko. "Uye Shoko rakazova nyama rikagara pakati pedu," muMunhu weMwanakomana waMwari.

⁶⁸ Zvino tinoona, kuti, mushure mekunge Vaona kukanganiswa kukuru uku, tingati, dai akanga ari iwe nen, uye takaisa nguva yese iyoyo nesimba, tingadai takakavira chinhu chacho kwakadaro uko zvino tongochirega chakadaro, asi, kwete Mwari, Vakanga vasingadi kurega basa raVo richinoparara. Ndirwo rudo rwaMwari. Ndosaka mudetembi akati:

Kana dai taizadza gungwa neingi,
Uye matenga akagadzirwa riri bepa
rokunyorer;
Uye dzinde rimwe nerimwe riri panyika riri
chinyoreso;
Uye munhu wese pabasa ari munyori;
Kunyora rudo rwaMwari vari kumusoro
Taiomesa nyanza ichipwa;
Kana bepa racho haraigona kutakura zvese,
Kunyangwe rakanbanudzwa kubva kune
rimwe denga kuenda kune rimwe denga.

⁶⁹ Onai rudo rwaMwari! Mushure mekunge munhu awa uye nemaune azarura musuwo kumuvengi, zvino ndokupinda uye ndokumusvibisa, nekuisa rufu maari, kunyangwe zvakadaro Mwari vakanga vasingade kuti izvi zvikundwe. Vakaburuka ndokutangisa patsva zvakare. Vakanga vari kuzogadzirazve munhu iyeye.

⁷⁰ Vakaisa Adhamu pasungano, "Ita *ichi*, uye kwete *ichi; ichi*, uye kwete *icho*; rega kubata, usabata, usaravira."

⁷¹ Asi tinoona kuti, paVakatanga zvakare, Vakatanga na-naAbrahama. Uye muna Abrahama, Vakamutanga nesungano isina zviga. Kwete "kana uchizo." "Ndatoita. Ndatoziita kare. Ndakuropfadza, iwe nembeu yako, nevamwe vakadaro, vari shure kwako." Yakanga iri sungano isina zviga. Vakatanga naAbrahama, basa raVo rohumhizha zvakare, uye zvino nesungano yaVo isina zviga. Zvino, patinoona kuti, Vakatangira pana Abrahama ndokumupa sungano, isina zviga, ine vimbiso.

⁷² Zvadaro Vakauya kumadzitateguru, tevere tinouya, muTestamende Yakare, patinenge tichidzika. Pano Vakaratidza

hwaro hwebasa raVo. Zvino tina Abrahama, Isaka, Jakobho, Josefa; madzitateguru mana.

⁷³ Zvino, Abrahama aimiririra basa rekutenda, kutenda, nokuti Abrahama aiva kutenda. Aiva nekutenda kukuru, nokuti, "Haana kudzedzereka pavimbiso yaMwari, kubudikidza nekusatenda." Apo, patingati, "ari panguva yakaoma," uye zvose zvichipesana naye, akaramba akabatirira pana Mwari.

⁷⁴ Zvino tinova naIsaka, akanga ari mwanakomana anodikanwa, aimiririra rudo, nokuti, Abrahama ari mufananidzo waMwari, sokupiriswa kwakaitwa Isaka, Genesi 22, tinoona kuti akatakura huni achikwidza chikomo, uye zvose zvaifananidzira Kristu, zvakafanoMufananidzira. Ndokubva gondohwe rauya rikabayiwa pachinzvimbo chake.

Zvino ndiko kwaiva kutenda, rudo.

⁷⁵ Uye *Jakobho*, zvinoreva "tsotsi," uye ndiye munyengeri. Uye tinocherechedza kuti hupenyu hwaJakobho chaizvoizvo hwaimiririra nyasha, nokuti dzakanga dziri nyasha dzaMwari, nguva dzose, naJakobho.

⁷⁶ Zvino kwakauya Josefa. Hapana chipomerwa pana Josefa. Akanga ari uyo akakwaniswa. Muporofita waMwari akauya pakati pehama dzake. Uye akavengwa, pasina chikonzero, uye akatengeswa. Zvino pamaitiro ose, hupenyu hwake hwakafanofananidzira hupenyu hwaJesu Kristu. "Akauya kune vekwaKe, vekwaKe havana kuMugamuchira." SaJosefa aivengwa nevakoma vase, akakandwa mugomba, achiitwa sokunge akanga afa; akabuditswa, akasimudzirwa kuruoko rworudyi rwaFarao. Zvino paakabva pachigaro, vakaridza hwamanda, munoziva, ibvi rose raifanira kupfugama, uye kuna Josefa.

⁷⁷ Tinoona kuti Jesu akapotsa atengeswa nemutengo wakafanana newaJosefa. Akatorwa kubva mu—kubva mugomba; ndokukwira Kudenga; onogara kuruoko rworudyi rwaMwari. Uye paAnobva paNzvimbio iyoyo, "Hwamanda icharira, neibvi rose richapfugama, uye nerurimi rwose rwuchapupura kwaAri," kukwaniswa.

Ndiko kwaiva kutenda, rudo, nyasha, nekukwaniswa.

⁷⁸ Zvino basa rekugadzira mutumbi rakatanga, rechivezwa chikuru ichi. Vakagadzira mutumbi nevaporofita. Vaporofita ndivo vakave kugadzirwa kwemutumbi.

⁷⁹ Zvino pakupedzisira kwakauya musoro wemutumbi mukuru uyu, waiva Kristu pachaKe. Vaprofita vose vakanga vafanotaura nezvaKe. Basa rose renheyo rakanga rafanotaura nezvaKe. Nzira yose kubva mubindu reEdheni, kubva panguva chaiyo yaVakatanga, "Ndichaisa ruvengo pakati pembeu yako nembeu yenyoka." Uye tinoona kuti Vakatangira ipapo, ndokuuya kubudzikidza nemuma—madzitateguru nemuvaporofita,

ndokubuda kunze uko. Zvakare Vakaona mufananidzo waWo pachavo, pakaberekwa murume mumwe panyika, kubva muchizvaro chemudzimai, ndihwo hwaive Humhizha hwaMwari. Akanga ari Mwanakomana waMwari, Jesu Kristu. Chikonzero Aiva, nokuti Aiva Shoko rakakwana.

⁸⁰ “Pakutanga Shoko rakanga riripo, uye Shoko rakanga riri kuna Mwari, uye Shoko rakanga riri Mwari. Zvino Shoko rakaitwa nyama rikagara pakati pedu.”

⁸¹ Zvino tinoona chinoratidzwa maAri humhizha hwakakwana. Akanga akakwana kwazvo, saMwari, kusvikira Akati, “Kana Ndikasaita mabasa aBaba vaNgu, musaNditenda. Kunyange iNi... Hamukwanise kuNditenda? Tendai mabasa, nekuti ndiwo anopupura kwamuri, kuti ndiNi Ani.” Ndinozififarira izvozvo. Maona? Akati, “Kana musingaNditendi...”

Vakati, “Iwe uri Munhu, ari kuZvienzanisa naMwari.”

⁸² Akati, “Kana musingaNditendi, tendai mabasa aNdinoita. Uye kana ndikasaita mabasa eUyo akaNdituma, zvino hamuna kodzero yekuNditenda.”

⁸³ Saka ndizvo zvakafanira Mukristu wose, nhasi, kuva nechapupu chimwe chete ichocco. Kana muShoko raMwari rino rakavimbisa, kana hupenyu hwedu husingakodzeri uye nekuenderana chaizvo nezvakataurwa neShoko, ipapo hatina kodzero yekuzvidaidza kuti Makristu kana tisina kuzvarwa patsva. Jesu akati, muna Marko 16, “Zviratidzo izvi zvichatevera avo vanotenda.” Maona? Kwete kuti “zvingangogona; zvinofanira kudaro; zvichida zvichadaro.” Zvichadaro. Ndiye Muvezi akatigadzira. Ndiyo Chechi yakavezwa. Ndiwo—ndiwo Mutumbi waKristu.

⁸⁴ Zvino tinoona kuti zvakaMuratidza zvakakwana. Muvezi zvino aiva neShoko rakaratidzwa muHumhizha zvakare, hwainzi Mwanakomana waKe, Mwari, Emanueri. Chingofungai, kuti, munhu akanyatsozvipira kwazvo kusvikira Mwari vakaZviratidza imomo, mumutumbi iwoyo, uye Akava... Iye naMwari vakava mumwe. “Ini naBaba vaNgu tiri Mumwe. Baba vangu vanogara maNdiri. Ndinoita nguva dzose izvo zvinofadza Baba.”

⁸⁵ Ko dai muKristu nhasi uno aizogona kuva nechapupu chakadaro? Waizova humhizha imo muno muYuma, mumugwagwa. Kana uri mudzimai anowacha kunze uko kuseri kwetabhu yekuwachira, unenge uchiri humhizha kuna Mwari, apo unogona kuti, “Ndinoita nguva dzose izvo zvinofadza Mwari,” uye pasi rose rinogona kuona ba—basa rajesu Kristu richiratidzwa mauri.

⁸⁶ Zvinonzi, imwe nguva, goridhe rekare, vasati vava kunyunguditsa. Ivo... Vaisitora goridhe vorirova nenyundo, nyakurova aidaro, maIndia mumazuva ekutanga apo Arizona

yaive muhudiki hwayo. Vairova goridhe nenyundo kusvika nyakurova aona mufananidzo wake iye mugoridhe. Vakapwanya iron pyrite yose, marara, netsvina, kubva mariri, kutozosvikira nyakurova aona mufananidzo wake segirazi, achirova.

⁸⁷ Zvino, ndizvo zvinoita Vhangeri. Vanhu vazhinji kwazvo havadi kushandurwa uye nekurohwa. Saka, chinodiwa nechechi manheru ano kurohwa kwakanaka, kwechinyakare, neMweya Mutsvene uchirovera kunze, nyika nezvinhu zvenyika. Ndizvo zvinodiwa nePentekosti manheru ano. Ndizvo zvinoda misangano yedu manheru ano, kurova uchipindura goridhe, kwakanaka, kwechinyakare, kusvikira nyika yose yarohwa kubva matiri, uye Jesu Kristu oratidzwa.

⁸⁸ Regai ndive nevanhu vashoma ava vari muno manheru ano, vakarangarirwa zvizere kuna Kristu, uye hupenyu hwavo hwakakumikidzwa kuna Kristu. Ndinogona kuita zvakatowanda nevashoma ava, kana kuti Mwari vanogona kuita zvakatowanda, waro, nevanhu vashoma ava vari pano, kupfuu zvaungaite newose Mubatanidzwa wemaChechi ePasi Rose, kuHumambo hwaMwari. Munhu mumwe chete akazvipira mumaoko aVo zvizere, ndizvo zvoga zvinodiwa naMwari.

⁸⁹ Asi, munona, hatisi kuda kuramba takamira toVarega vachirova divi *iri*, divi *iro*, voburitsa *izvi* kunze, vorovera *icho* kunze, vobvisa pfungwa *iyi*, *neiyo*, uye torega Jesu Kristu achiratidzwa matiri. Tinoona mafirimu akawandisa. Tine materevhizheni akawandisa. Tine zvimwe zvinovaraaidza zvakawanda zvenyika, kusvikira chechi yarasikirwa nekutapira kwayo kuvanhu. Imhaka yekuti Mwya Mutsvene unobuda, zvino chimwe chinhu chopindamo. Ndizvozvo, shamwari.

⁹⁰ Ndinonzwa zvapupu, maPentekosti echinyakare, kuti vaiita misangano yeminamato husiku hwese. Madzibaba naanamai vedu, makore makumi mana, makumi mashanu apfuura, vainamata husiku hwose. Vanhu vaivavenga, mumugwagwa. Uye tinofunga, nhasi, kana munhu wose akasatibhabhadzira pabendekete, nhai, pane chimwe chinhu chisina kumira zvakanaka nesu. “Nhamo kwauri kana vanhu vose vachitaura zvakanaka pamusoro pako.” Akazvidzwa uye akarambwva nevanhu, zvino isu tiri mufananidzo waKe. Ameni.

⁹¹ Chatinoda nhasi misangano yeminamato chaiyo, yechokwadi, kumwe kucheneswa, nzira yose kubva papurupiti kusvika kumuchengeti wenzvimbo, imba yose kuti icheneswe, naMwari, kurohwa, woratidza mufananidzo weMurovi, Vhangeri richiparidzwa musimba rerumuko rwaKristu. Ndizvozvo chaizvo.

⁹² Vhangeri diki iri rnofarirwa nevazhinji ratakava naro, uye nokubhabhadzira *uyu* papfudzi, nekuita *uyu* mudhikoni, neuyo ari mukuru wedunhu, kana zvimwewo zvakadaro, zvose zvematongerwo enyika. Handizvo chaizvo here zvakaitika

muNicaea, kuRoma? Tinoda kubva kuzvinhu izvozvo. MaMethodisti, maBaptisti, maPresbyteriani, maPentekosti, navose, tinofanira kubva mazviri.

⁹³ Zvematongerwe enyika hazvisi zvemuChechi. Mweya Mutsvene ndiwo uri kuzotonga Chechi, uye kwete kuvhota kwezvematongerwo kwekuti uyu ndiani. “Mwari vakaisa muchechi vamwe vaapostora, vamwe vaporofita, uye vamwe vadzidzisi, nevavhangeri, nevafudzi.” Kwete kuti vanhu vakavavhotera imomo. Mwari vakavaisa imomo, nokudana kweMweya Mutsvene, misangano yeminamato, nokuturikwa kwemaoko, nokugara pamberi paMwari.

⁹⁴ Asi, nhasi, taita kuti chinamato chedu chive chinofarirwa nevanhu zvekusvika panzvimbo yekuti chive kuita sezvematongerwo enyika, pachezwavo, atinoita mumasangano edu ose. Tiri... Mumwe haakwanise kunongedzera kune mumwe. Tese tine mhosva. Imomo munowana vamwe varume vechokwadi nevakadzi vechokwadi. Asi dambudzikio heri, zvandiri kufunga nezvazvo, tiri kuenda tichiwandira ku-kudivi revashoma, vanhu vechokwadi vanoda kutenda uye vanoda simba raMwari. Pane vakawanda vakaunzwa nechiitiko chekungoshamwaridzana, “Saka, *uyu* murume akanaka. Muchinda akanaka.”

⁹⁵ Tine machechi akanaka. Tinovaka machechi akanaka, nemachechi ari nani pane ataimbova nawo. Ndizvozvo. Hapana chinopesana nazvo. Ndinofarira kuona chechi ichibudirira.

⁹⁶ Asi, hama, ndingasva ndaiona ichibudirira musimba raShe pane kubudirira muzvinhu zvenyika. Dzokerai kuVhangeri zvakare! Dzokerai kusimba raMwari! Dzokera kupentekosti, iyo...sezvaive yepamavambo. Asi, munoona, dambudzikio razvo nderekuti, hatidi kurohwa ikoko.

⁹⁷ Unogona kutaura chimwe chinhu pamusoro pechimwe chinhu, uye chimwe chinhu chehunzenza chiru kuitwa nechechi, kana—kana chimwe chinhu chisina hunhu, pakare ipapo vanokuramba, vobva vavhara misuwo. Haukwanise kupinda, munoona, nokuti vanoita musangano zvino vokuvharira kunze. Havachakudi zvachose. Vanoti, “Unopenga. Warasikirwa nenjere dzako.” Asi chero bedzi iri ZVANZI NAJEHOVHA, izvozvo hazvina basa kwandiri zvinotaurwa nechero munhu hake. Zvinotora simba raKristu kushandura munhu. Zvinotora simba raKristu kuchengeta munhu.

⁹⁸ Uye sezvakataura Jesu pane imwe nguva, “Cherechedzai hapa. Asi zvakadaro ndinoti kwamuri Soromoni, mukubwinya kwake kwose, haana kumboshonga serimwe rawo.” Soromoni, mukubwinya kwake kwese, aive chiono chi—chinoyevedza. Hapana kupokana. Akanga ari chinhu chikuru kunyika, uye ari munhu mukuru pamberi paMwari. Asi nguwo yaSoromoni yakanga isina hupenyu mairi. Chakanga chiru chibenga chejira,

zvichida chakaveurwa kubva pamusana wegmai. Asi, hapa raive nehupenyu.

⁹⁹ Chatinoda nhasi ndihwo Hupenuy hwaKristu huri mukati medu. Ndihwo hunochenesa; kwete zvekunze, kora yakapindurudzwa, kana dhigirii rekuongorora pfungwa, kana chimwe chinhu. Zvinotora simba raKristu akamuka kutiita zvatinofanira kuva. Mwari havana rimwe zano kunze kwekutendera Mweya Mutsvene utonge nekubata simba muChechi.

¹⁰⁰ Oo, Mwari, Aive zvakanyanya chaizvo mumufananidzo waMwari, kusvikira Iye naMwari vakava Mumwe. “Ini naBaba vaNgu tiri Mumwe.” Oo, ini zvangu! Kwaive kurarama kwakadini, kuti Mwari vanyatsogara maAri, zvekuti hupenyu hwaKe hwese hwaive hwakaputirwa muna Mwari. Ndosaka hwaive humhizha!

Satani akauya kwaAri.

¹⁰¹ Nguva yese Mwari pavakafunga kuti Vave nehumhizha, Satani akapinda. Akapinda muna Mosesi, zvino akatyora mirairo. Asi paakasvika kune Humhizha uhwu, kwaive kuri kusarudza kwaMwari pachavo. Ameni. Vaive—Vaive vakafanoMugadza. Hazvina kumuitira zvakanaka. Akaramba akatendeka kuna Mwari, zvino Mwari pavakaMutarisa ndokuona kuti Akaedzwa kwemazuva makumi mana murenje, saMosesi. Ndizvo, varume vose ava vakafanoMufananidzira. Murairo wakatyorwa. Asi paakauya, Satani, muedzi mukuru, akaedza kuMuedza, akaona kuti haana kuwana Mosesi ipapo. Kwete, changamire. Akarovera pazviuru zvishanu zvemagetsi akabvura mapapiro aka paakasvetukira pana Iyeye.

¹⁰² “Zvakanyorwa zvichinzi,” Akadaro. Maona? Adhamu akawira pasi. Asi, Jesu, Adhamu wechipiri, Humhizha huya hwakanga hwauya, kuva Mudzikinuri, Akati, “Zvakanyorwa zvichinzi, ‘Munhu haangararami nechingwa bedzi, asi neShoko rimwe nerimwe rinobuda mumuromo maMwari.’” Ipapo Aiva neHumhizha. Hongu, changamire. Akataura zvimwewo. Akati, “Zvakanyorwawo kuti, ‘Usaedza Jehovha Mwari wako.’ Ibva ipapo, Satani.” Hapo paiva neHumhizha. Chii chaAkaita?

¹⁰³ Kwete kuti, “Ndichaudza chechi yangu. Ndichaита kuti vakuru vedunhu vaite *zvakati-nezvakati*. Bhishopi achaita *zvakati-nezvakati*.”

¹⁰⁴ Akati, “Zvakanyorwa zvichinzi.” Ndiko kuseri kwaVakaisa Adhamu waVo wekutanga, zvino akawa, uye Satani akahukanganisa. Asi haana kugona kusvibisa Uyu, zvisinei nezvaakaita. Zvekuti, kusvikira iye . . .

¹⁰⁵ Mwari vakati, “Uyu ndiye Mwanakomana waNgu wandinoda. Munzwei. Zvese, Ndakapa zvese kwaAri. Imi, Munzwei.” Vaive Mumwe. Vaive Mumwe chete. Mwari vaigara maAri, vachiMuita Mwari, Emanueri, panyika. Aiva Gwayana

rakakwana, oo, Humhizha hwakakwana hwerudzikinguro. Zvakafadza Mwari, zvino, sezvakangoita Michelangelo, Vakafemerwa kwazvo nehupenyu hwaKe. Tinowana mu... .

¹⁰⁶ Ndine Magwaro akanyorwa pasi pano. Marko 9:7, kana uchida kuriverenga. Apo...iGomo reKushandurwa. PaAive kumusoro paGomo reKushandurwa, tinoona kuti pakaonekwa Mosesi, uye pakaonekwa Eria.

¹⁰⁷ Uye ipapo, chinhu chekutanga munoziva, muapostora Petro akafemerwa kwazvo, kusvikira akati, “Ngativakei matumba matatu pano. Tichangoita masangano matatu kubva pane izvi. Tichaita masangano matatu: rimwe raMosesi, rimwe raEria, uye nerimwe reNyu.”

¹⁰⁸ Achiri kutaura, kwakauya inzwi kubva mugore iroro. Rikati, “Uyu ndiye Mwanakomana waNgu wandinoda. Ndiri kufadzwa kwazvo naYe, ndichaMurovera imi. Munzwei. Ari kuzotaura.”

¹⁰⁹ “Akakuvaldzwa nokuda kwokudarika kwedu. Akaiswa maronda nokuda kwekusarurama kwedu.” Akanga ari Gwayana, Gwayana raMwari, Chibairo chakakwana. Hakuna kumbova nomumwe akararama saYe, hakuna kumbova nomumwe kubvapo akararama saYe. Akanga ari Humhizha hwakakwana, hwainyatsoenderana neShoko raMwari nemomeno.

¹¹⁰ Mwari pakutanga vakapa Shoko raVo, mugove wechikamu *ichi* chenguva, wechikamu *icho*, wechikamu *icho*.

¹¹¹ Ndipo apo vanhu vanonyengerwa kwazvo nekuvhiringika nhasi. Vari kuedza kuvakira pane chimwe chinhu chakaitika makore makumi mana, makumi mashanu akapfuura. Tiri... . Izvozvo, zvakapihwa kuzera iroro.

¹¹² Zvaizobatsirei Mosesi kuti auye ne—nemharidzo yaEnoki? Zvaizobatsirei Mosesi kuuya ne—nemharidzo yaNoa? Ko zvaizobatsirei Jesu kuuya ne—nemharidzo yaMosesi? Maona? Uye zvaizobatsirei Wesley kuuya nemharidzo yaLuther? Zvaizobatsirei Pentekosti kuuya nemharidzo yaWesley? Munoona zvandiri kureva?

¹¹³ Zvose zvakaiswa munguva yazvo muBhaibheri, uye tinofanira kuziva zera nenguva, uye nezviri zvedu. Uye ndipo patiri kukundikana nhasi. Tiri kuverenga zvime zvese kunze kweBhaibheri. Rino ndiro zuva ratinofanira kunge tiri kurarama. Rino ndiro zuva ratakaiswa pano naMwari. Ngatitarisei muShoko.

¹¹⁴ Ndiko kutadza kwavanoita kuona Jesu; vaFarise ivavo, nevaSadhuse, vaHerodhi. Masangano akasiyana-siyana ezuva iroro akave nazvo zvakanyatsorongwa, uye zvakanyatsorongwa zvakakwana, pakanga pasina nzira yekutiza, vakafunga. Asi paAkauya, Iye zvamazvirokwazvo... . Akanga akasiyana navo vose zvavaifunga. Aive Muchinda mudiki, akazvininipisa

akaberekerwa muchidyiyo, aine...achifungirwa kunge ari Mwana wehupombwe, nezvimwe zvinhu zvose izvi zvakadaro.

¹¹⁵ Asi, zvakadaro, Akauya nenzira chaiyo yakarehwa neGwaro kuti Aizouya. Zvino vakanga vajaira zvakataurwa naMosesi, zvino Mosesi akataura nezvaKe. Akati, "Saka, dai maiziva Mosesi, mungadai makaNdiziva. Mosesi akataura nezvaNgu." Uye zvakadaro havana kukwanisa kuzviona. Vakangovhiringidzika mutsika dzavo, kusvikira vasisagone kuzviona. Asi, munooona, haAna kuuya kuzoratidza masangano iwayo ezuva iroro. Haana kuuya kuzoratidza chitendero chakasiyana nezvimwe zvitendero.

¹¹⁶ Akauya kuzoratidza Baba, uye Baba vaive Shoko. Ameni. Zvino ndinonzwa chaizvo manyukunyuku ekunamatia. Akauya kuzoratidza Shoko raBaba. Mwari vakati Achange aripo, uye hapo paAive, Humhizha hwakakwana hwebasa guru remaoko aMwari. Oo, ini zvangu! Akanga ari chadzera chaVo chakakwana. Airatidza zvose izvo—izvo zvakanga zvakataurwa naMwari. Akaratidza zvakataurwa naAdhamu pamusoro paKe. Akaratidza zvese zvakataurwa nevaporofita, zvese zvakataurwa nemadzitateguru. Zvose zvaAkataura, Akanga ari kuzadzikiswa kweShoko. Mifananidzo yose yakazadzikiswa maAri. Hongu. Akava Jehovha weTestamende Itsva. Aiva Jehovha weTestamende Yekare. "Shoko kareko," raiva muShongwe yeMoto, "rakaratidzwu ndokugara pakati pedu." Jehovha weTestamende Yekare akava Jesu weTestamende Itsva. Akanga ari mufananidzo wakakwana waMwari.

¹¹⁷ Oo, dai Chechi nhasi yangokwanisa kuratidza Chechi iya yekutanga, apo Mweya Mutsvene wakaburuka neZuva rePentekosti! Dai Mukristu nhasi agona kuratidza! Tiri boka remasanganiswa, kune zvavaive.

¹¹⁸ Ndapfuura, ndichiuya nhasi, Ndanga ndichitarissa, ndichidzika zasi kuno, ndichipfuura nepane imwe yeCasa Grande duku, kana dzimwe dzenzvimbo diki idzi pano, Ndacherechedza kuti panga paine purazi re—redonje, nealfalfa yakasiyana. Vatozenge vachifanirwa kuva nemawindimiri ipapo, kupomba mvura, kuti zvirambe zvakadaro. Sei? Hazvisi zvepo. Kwete zvirokwazvo. Asi, tarisai madhorofiyi ekare, kungasanaya kwemakore mashanu zvino anorarama. Uye ukatadza kuisa mvura pazviri kwemazuva mashoma, uye zvinofa. Munoonaa, hazvisi zvepamavambo.

¹¹⁹ Ndizvo zvatiri. Tinofanira kutoitwa vacheche, nekuitwa vanhu vakuru muchechi, nekubhabhadzirwa, nekudaidzwa kuti izvi, izvo, kana zvimeewo.

¹²⁰ Zvino, Makristu iwayo epamavambo akanga akakwasharara. Vaive vasina hanyn'a kuti ndiani aivabhabhadzira kumusana. Vakaratidza Jesu Kristu, zvakanyanya, zvekuti vakati...Vakacherechedza kuti ivo—

ivo vakanga vasingazivi uye vasina kudzidza. Havana kuenda kuchikoro chesekondari, uye vakanga vasina dhigirii rekukoreji. "Asi vakacherechedza kuti vakambenge vaina Jesu." Ndizvo zvavanoda, Makristu nhasi, kuti vacherechedze kuti wanga uina Jesu. Pane chimwe chinhu pauri, chakasiyana. Ndinoziva kuti hazvisi... Ndicho chinhu chisingafarirwe chekutaura, asi isu hatisi kutsvaga mukurumbira. Makristu haasi kutsvaga chimwe chinhu chiri nyore.

¹²¹ Imwe hanzvadzi yechikuru muchechi yangu makore apfuura, yaisimbomira ichiimba rwiyo urwu:

Ndzingafanira here kutakurwa kuenda
kumusha Kudenga
Ndiri pamutambarakede,
Apo vamwe vakarwira kuwana mubairo
Nokufamba nemumakungwa eropa?

Kwete, ndinofanira kurwa kana ndichifanira
kutonga.

¹²² Unofunga zvawaizoita dai wainge uri pano uye zvinhu zvese zvichipesana naJesu Kristu, dai wakarama mumazuva aKe. Uri kurarama mune iwayo, hama yangu, hanzvadzi. Ndizvozvo. Achiri Shoko. Tarisai kuti vari kuRitsika-tsika sei nhasi. Tarisai kuti vari kuedza kuRiita sangano sei, nokuRibatanidza, nezvimwe zvose zvakadaro, nenyika. Mira wakasimba. Iwe mira—mira naJesu Kristu neShoko raKe. Ngaparege kuva nechinozvidzivisa izvozvo. Nyatsogara naRo.

¹²³ Semurume muChaina wekare aiwacha, aimbouya kuno kuArizona neCalifornia, makore apfuura. Aisakwanisa kunyora kana izwi rimwe reChirungu. Akanga asingachizive. Waienda nenhumbi dzako dzaida kuwachwa kwaari. Munoziva zvaaizoita? Aive netuzvidimbu tudiki twemapepa, pasina chaive chakanyorwa pariri zvachose. Aingobvarura bepa iroro okupa chidimbu chimwe chete. Paunodzoka, chidimbu chebepa iroro chaifanira kuenderana nebepa rake, kana kuti waisazowana mbatya dzako. Zviri nani chose. Waigona kukopa zita, asi hawaizomunyengera ipapo, nekuti bepa iroro rinofanira kunyatsoenderana chaizvoizvo nechidimbu chebepa rake.

¹²⁴ Ndiyo nzira iyo Mwari yavakaita sungano yaVo zvakare. Chiitiko chedu hachisi chekuzvifananidza nechimwe chitendwa, imwe dzidziso, rimwe sangano rechechi, asi kuti chiri kuzoenderana neShoko raMwari, Jesu Kristu. Ndizvozvo. Kana tauya kuna Kristu, ipapo Kristu anobva atitora. VakaMubvarura nepakati, paKarivhari. Chimwe chikamu chacho Vakachisimudza mudenga, uye kunogara kuruoko rwaVo rworudyi, waiva mutumbi. Mweya, Wakauya, ndokutumwa kuno kuzoMugadzirira Mwenga. Uye chiitiko chimwe chete ichocco chaiva muna Kristu chinofanira kuva matiri.

¹²⁵ Aive—Aive zvamazvirokwazvo akakwana kwazvo kusvikira Akafadza Muvezi, ndokuMufemera zvakanyanya kusvikira AkaMurova paKarivhari. Oo, ini zvangu! Zvino tinoMuona sezvakataurwa neGwaro, humhizha hwaMwari. “TinoMuona akarohwa, achirohwa, uye achitambudzwa naMwari.” Hoyo humhizha hwemazvirokwazvo. SaAngelo akarova hwake, ndizvo zvakaita . . .

¹²⁶ Dai Akangorarama hupenyu hwakanaka, Angadai akaita sevamwe vanhu vanoparidza vhangeri rekufadza vanhu nhasi, “Akanga ari muprofita.” Akanga ari muporofita, asi Aipfuirira kuva muporofita. Akanga ari Mwari. Akanga ari Emanueri.

¹²⁷ Uye zvino zvakaMuita chaizvo, kwandiri, hu—Humhizha kwandiri nekwauri, nokuda kwekuti Mwari vakaMurova. VakaMurova paKarivhari. Dai Aive asina kurohwa . . . Zvisinei nokuti vangani vakafa vaAkange amutsa, Aive aparidza zvikuru sei, kuti hupenyu hwaKe hukuru hwaive chii, izvo zvaAireva kuti zvaisei, Akaratidzwa ipapo. Vakafadzwa kwazvo, Mwari vakadaro, kusvikira Akava Munhu ega akambomira pamusoro penyika wekuti Mwari vaigona kurova kuitira vamwe vose. Uyo Akakwana akarohwa nokuda kwevasina kukwaniswa. Zvisikwa zvose zvakanga zvawa, kubudikidza naAdhamu, zvakadzinkinurwa kubudikidza naJesu Kristu. Humhizha hwaMwari hwakakunda muedzo. Akazviita sei? NeShoko. “Zvakanyorwa zvichinzi, ‘Munhu haangararami nechingwa chete, asi neShoko rimwe nerimwe rinobuda mumuromo maMwari.’”

¹²⁸ Oo, shamwari Mukristu, pfeka nhumbi dzose dzokurwa nadzo dzaMwari. Usamira shure uine kamwe kapfungwa kechimwe chitendwa, kana chimwe chinhu chawakamira nacho. Pfeka nhumbi dzose dzokurwa nadzo dzaMwari paunoenda kunorwa nemuvengi, sezvakaita Ishe vedu. Akaratidza kuti dera rematera reMukristu rinogona kukunda Satani neShoko chete. Aiva nemasimba, Aigona kunge akarova Satani nechero nzira zvayo yaAida, asi haAna kurishandisa. Akangotora Shoko ndokumukunda naRo. “Zvakanyorwa zvichinzi. Žvakanyorwa zvichinzi.” Kwese-kwese, “Zvakanyorwa zvichinzi.” Saka Akakunda Satani neShoko raMwari.

¹²⁹ Zvino, ndihwo hwakange huri Humhizha hwakakwana uye Mwari vakaHurova. Waiva muenzaniso Wakadini! Chinhu chemazvirokwazvo zvakadini! Ungataura nezvechi—chivezwa chaMichelangelo chiri ikoko, naMosesi akarohwa pagumbo? Bhaibheri rakati, “Murume yuu akanga akakuvaldzwa kupfuura vanhu vose. Aive akakuvaldzwa zvakanyanya zvekuti Akanga asingatomboratidzike semwanakomana wemunhu. Akarohwa. Akakuvaldzwa. Aive akazara ropa. Akaiswa mavanga.” Iye . . . Zvese zvaigona kuitwa. Aingoratidzika sekunge—kunge murwi mukuru weRopa nemapfupa, zvaifamba pamwe chete. Akanga asingatomboratidziki semunhu, paAidhonza iwoyo kumusoro

paKarivhari. Mwari vakamurova nokuda kwedu. Ndizvo zvinoMuita Humhizha hwakakwana.

¹³⁰ Oh, ndinoMuda sei, kuziva kuti Akandiitira izvozvo, kuziva kuti Akakuitira izvozvo. Ko tingagona—tingagona kuita zvakaenzana nazvo sei? Hapana aigona kuita zvakaenzana nazvo. Hapana munhu akakodzera kuita zvakaenzana nazvo. Takanga tiri pano tisina tariro. Isu tisina Mwari. Isu tisina kana chero nzira zvayo yekudzikinurwa. Mumwe nomumwe wedu akaberekwa nekusangana pabonde, uye taingofanira kubhadhara mubhadharo. Asi Akauya, Uyo akakwana, uye akanga akakwana kwazvo uye achifadza kwazvo kusvikira Mwari vaMurova nokuda kwako nenii.

¹³¹ Zvino, kwemakore angada kusvika zviuru zviviri, Mwari vanga vachiedza kuMuvezera Mwenga wehumhizha, unonzi Chechi. Ndizvozvo. Mwari vanozviita sei? Vanozviita nenzira yaVo isingambofe yakashanduka, Shoko. Mwari havambofe yakashandura maitiro aVo. Chero ani zvake, unogona. Unoshanduka. Ndinoshanduka. Nguva inoshanduka. Nyika inoshanduka. Asi Mwari havashanduki, Vakakwana. Havashanduke. Uye maitiro aVanoita chero chinhu kekutanga, Vanozviita nguva dzose nenzira imwe cheteyo.

¹³² Vakaponesa munhu pane imwe nguva nekuti akatendeuka. Ndiyo nzira yavachaponesa nayo munhu zvakare. Vakapodza mumwe munhu nokuti aiva nokutenda. Vachapodza anotevera pahwaro humwe chetehwo. Havashanduri nzira yaVo, nokuti, munoona, Vanozvitongera uye Vanogara Nokusingaperi. Havana magumo, vari kwese-kwese, vanoziva zvose. Ndivo Mwari. Saka naizvozvo haVasungirwe kukumbira chero ani zvake huchenjeri. Havasungirwe kumirira kusvika Vadzidza zvakawanda. Havadi dhigirii idzva. Vakakwana. Uye chero dhigirii, uye chero chinhu chaVanoita kutanga, sarudzo yaVo yekutanga inoramba iri imwe chete nekusingaperi. Hazvigoni kushandurwa. Oo, ndinofara sei!

¹³³ Zvino paVakagadzira humhizha hwaVo hwokutanga, Vakamuisa kuseri kweShoko. PaVakagadzira Humhizha hwaVo hwechipiri, Aiva Shoko. Ameni. Akanga ari Shoko; kwete seri kweShoko. Asi, Akanga ari Shoko. Mwari havamboshanduri hurongwa hwaVo. Ndizvo chaizvo zvaVakatanga kuita neChechi yaVo yekutanga, Shoko.

¹³⁴ Zvino, Mwari, Shoko, pamavambo, Vakanga vakazvimirira yoga kubva kune vamwe vose, zvime vose, vamwe vanhu vose. Zvino, handirevi mukutaura izvi kuva ndakasiyana. Mwari mupatsanuri. Munozviziva? Munotaura nezvekubatanidza? Mwari mupatsanuri. Vanonyatsa kudaro. Vanopatsanura vanhu vaVo kubva kunyika. Vakapatsanura Israeri, rudzi rwaVo. Vari kuedza kupatsanura chechi yaVo kubva kunyika, asi chechi inoda kuenderera mberi nenyika. Asi vanhu vaVo vachiri

vakapatsanurwa, vakapatsanurirwa kwaVari. Ivo Ndiyaniko? Shoko.

¹³⁵ Ko munhu angava sei nerubhabhatidzo rweMweya Mutsvene, uye Mweya Mutsvene wakanyora Shoko, uye munhu ane rubhabhatidzo rweMweya Mutsvene oramba Shoko? Ko Mweya Mutsvene uri mauri ungaramba sei Shoko raWo rakaisirwa iwe? Handigoni kuzvinzwisisa. Unofanira kuwirirana neShoko. Uye kana mweya wako uri mauri usingatsigire imwe neimwe yevimbiso dzaMwari ne “ameni,” pane chimwe chinhu chakatsveyama.

¹³⁶ Hama Fred Sothmann kana mumwe munhu pano manheru ano, ataura, “Jesu Kristu mumwe chete zuro, nhasi, nokusingaperi.” Ndiye Shoko. Ndizvo, chokwadi. Anogara ari mumwe chete, munoona, uye mweya wako unofanira kutsigira izvozvo ne “ameni.”

¹³⁷ “Oo, Iye, neimwe nzira yaAri.” Munzira dzose, ndiYe mumwe chete zuro, nhasi, nokusingaperi.

¹³⁸ Zvino tinocherechedza kuti Mwari vakatanga kuMugadzirira mwe—Mwenga waKristu. Saka... Uye Mwenga unofanira kubatanidzwa naYe uye maAri, nokuti iwo chikamu chaKe. Zvino, Mwenga chikamu chaKe. Iye chikamu chaKe. Shoko rezuba iroro, Mwenga anova chikamu cheShoko iroro, nokuti ndiKristu. Zvino, munozvitenda here? Tinofanira kuva muna Kristu. Muna Kristu, tinofanira kuva vaKristu, muna Kristu, chikamu chaKristu.

¹³⁹ Mukadzi chii, kana atora murume, kana kuti murume atora mukadzi? Mukadzi iyeye anofanira kuva chikamu chake. Havasisiri vaviri. Vave mumwe.

¹⁴⁰ Uye Mwari naKristu pavakava mumwe, Vaive Mumwe. Nokuti, Mwari vakanga vari Shoko, uye Shoko rakaitwa nyama. Nyama neShoko zvakava Chimwe. Uye chechi painozova Mwenga waKristu, Iyo neEvhangeri zvakafanana.

¹⁴¹ Ungati sei, ipapo, “Mazuva ezvishamiso akapfuura”? Ungati sei, ipapo, “Haasi mumwe chete zuro, nhasi, nokusingaperi”? Ungati sei, “Zvinhu izvozvo ndezvemuapostora kana mudzidzi, kana mumwe munhu mune rimwe zuva,” kana uri chikamu chaKe?

¹⁴² Apo, Akati, “Denga nenyika zvichapfuura, asi Shoko raNgū harimbokundikane.” Ko Zvakazarurwa 22, paAkapedza kunyora Bhuku? Akati, “Ndinopupura kuti kana chero munhu akawedzera shoko rimwe, kana kubvisa Shoko rimwe kubva maRiri, chikamu chake chichabviswa muBhuku reHupenyu.”

¹⁴³ Tichasvika sei Kudenga, pakadaro, toti, “Saka, ndinotenda izvi, asi handitende izvo”? Unofanira kuva Shoko rizere, nokuti uri chikamu chaKe. Ndiyo nzira iyo Mwari vari kuedza kugadzira Chechi yaVo nhasi, kwete nechitendwa. Uye

vari kuedza kutimanikidza kupinda imomo, hama. Unogona kuzviona zvichiuya. Chinyorwa chiri pamadziro. Hazvizotora nguva yakarebesa kusvikira tave Chechi yepasi rose. Uye chechi yose ichatofanira kuwira mazviri, kana kuti kumisidzana nemamiriro ezvinhu. Zvakanaka, wakagadzirira kumisidzana nazvo here? Zviri nani usazviita nekuda kwekuti unofunga kuti ndicho chinhu chakafanira.

¹⁴⁴ Zviri nani uve naKristu mauri, nokuti Shoko iroro ndereKusingaperi, uye Shoko iroro ndiro richazokumutsa zvakare. Unova chikamu cheShoko iroro. Wakabatanidzwa neShoko.

Nhasi, unoti, “Ndiri Mukristu.”

¹⁴⁵ “Uri wesangano ripi?” Saka, hazvina kana chinhu chimwe chekuita neChikristu.

¹⁴⁶ Zvakanaka kuva nemasangano. Handipikisane nazvo. Asi, munoono, izvozvo, ndizvo izvo vanhu vari... Vanhu vazhinji vanoti ndinoputsa masangano, ndinoakava. Handidaro. Kwete, changamire. Masangano, akanaka. Zvakangofanana nezvibvumirano zvemashandiro, kana chimwe chinhu chakadaro. Asi kana ukamirapo, nekuti unoti, “Ndiri Mukristu nekuti ndiri weimwe chechi *yakati-ikati*,” izvozvo hazvireve chinhu. Unofanira kuva waKristu, uye Kristu iShoko. Uye nguva zhinji masangano iwayo ari kure neShoko sezviri Mabvazuva neMadokero.

¹⁴⁷ Unofanira kugara neShoko iroro, kuti uve Mwenga. Kana uri muMwenga, uri muShoko, uye Shoko riri mauri. Uye Shoko rairatidza Mwari kubudikidza naKristu, rinoratidza Mwari mumwe chete kubudikidza nemauri. Ameni. *Ameni* zvinoreva “ngazvive saizvozvo.” Saka, ngazvive saizvozvo. Ndinozvitenda kuva Chokwadi. Unofanira kubatanidzwa naVo.

¹⁴⁸ Zvino, kana ndichizova wemuAmerica chaiye wechokwadi, kana ndichizova mugari wechokwadi wemunyika ino, ndinofanira kubatanidzwa nayo. Ndinofanira kuva zvose zvayakambova iri, zvakanaka kana zvakaipa. Ndinofanira kuva zvose zvairi, zvakanaka kana zvakaipa; zvose zvaichazova, zvakanaka kana zvakaipa. Ndinofanira kuzvibatanidza nenyika ino, kana ndichizove wemuAmerica. Ndizvo here? Mukubwinya kwayo kana kunyadziswa kwayo, rusununguko kana kutsva, chero zvairi, ndinofanira kuva mutti wekusafa kwayo. Ndinofanira kumira sechikamu chimwe. Zvese zvairi, ndiri. Zvese zvayakambova, ndiri. Zvose zvaichazova, ndinofanira kuva mugoverani nayo. Ndizvozvo.

¹⁴⁹ Chimbofunga nezvazvo kwemaminitsi mashoma. Zvino, kuva izvozvo, sewemuAmerica... Ndichazvisvitsa kwamuri, kuti muve nechokwadi chekuzviona, ndichivhara.

¹⁵⁰ Kuva wemuAmerica, ndinofanira kubatanidzwa nezvose zvayakamboita. Zvino, ndakasvikira paPlymouth Rock, ne—

nemadzitateguru. Ndakanga ndiri paPlymouth Rock neVafambi. Ndaive navo ipapo. Ndakatasva bhiza ndiri pamwe chete naPaul Revere, humwe husiku, kuti ndiyambire nyika ino nezvenjodzi dzayo. Ndaifanira kudaro, kana ndaiva wemuAmerica.

Unoti, “Oo, Hama Branham!”

¹⁵¹ Mirai zvishoma. Bhaibheri rakati, muna VaHebheru chitsauko 7, kuti, “Revhi wakagamuchira zvegumi, wakabhadhara chegumi, nekuti aiva muchiuno chaAbrahama paakasangana naMerkizedheki,” baba vababa vasekuru vake, uye chikaverengerwa kwaari. Mwana wemwana wemuzukuru wake paakanga achiri muchiuno chake, Abrahama paakabhadhara chegumi kuna Merkizedheki, Mwari vakachigovera. Vakazviita here? Ndizvozvo chaizvo.

¹⁵² Chero zviri nyika ino, ndiri. Ndizvozvo. Saka, ndakasvikira paPlymouth Rock. Ndakatasva bhiza pamwe naPaul Revere.

¹⁵³ Ndakayambuka Valley Forge, ndaive parwizi irworwo rwune chando naGeorge Washington. Ndakanga ndiri mumwe wemasoja emuAmerica vakanga vasina kana shangu, vachienda kunorwisana nemaBritish. Ndaiva netsoka dzinotonhora mangwanani iwayo, pandakaputira tsoka dzangu. Ndakaona Washington achibuda murenje, akanyorova, kusvika chaiko muchiuno chake, kubva pakunamata husiku hwese. Ndaivepo pazvakaitika.

¹⁵⁴ Ndakamira naStonewall Jackson, apo kupikiswa kwainge kwakakura kwazvo. Paya mauto okumusoro paakatumira zasi ikoko, vakati, “Mauto ose apararira achidududza.”

Vakati, “Jackson aripi?”

¹⁵⁵ Ndokuti, “Akamira somudhuri wemabwe.” Ndikamira naye ipapo; muchinda, mudiki-diki, ane maziso ebhuruu.

¹⁵⁶ Vakamubvunza imwe nguva, “Ungamira sei iko kupikiswa kwakakura kudai?”

¹⁵⁷ Murume akadzikama kwazvo, akakava njombo yake, sokudai, akati, “Handifi ndakanwa mvura pamuromo wangu, kusvikira ndatenda Mwari Samasimba.” Ndakamira naye mukutenda kwake. Ndakamira naStonewall Jackson. Ndizvozvo.

¹⁵⁸ Ndakanga ndiri paPati yeTii yekuBoston. Ndakabatsira kukandira imwe yeTii yechiBritish munyanza. Ndaifanira kuva, kuti ndive wemuAmerica. Hongu, changamire. Hongu, changamire. Ndakasaina Ziviso yeRusununguko, naThomas Jefferson. Ndakaridza Bhero reRusununguko, musi wa4 Chikunguru, 1776.

¹⁵⁹ Ndinobatanidzwa munyadzi dzayo dzechimurenga, apo hama yakarwa nehama, uye baba vachirwisana nemwanakomana. Ndinofanira kuzvibatanidza mukunyadziswa

kwayo, zvimwe chetezvo sekubatanidzwa kwandinoita mukubwinya kwayo. Ndizvozvo chaizvo.

¹⁶⁰ Ndakanga ndiri paWake Island apo masoja ose akarasikirwa nohupenyu hwavo. Ndakavaona vachizviita. Ndakavaona pavakatora Wake Island. Ndakabatsira kusimudza mureza paGuam. Zvirokwazvo.

¹⁶¹ Zvese zvayakanga iri, uye zvese zvayakamboita, zvese zvairi zvino, ndinotaura ndichidada kuti ndiri chikamu chayo, nokuti ndinofara kuva wemuAmerica. Haudarowo here?

¹⁶² Kuva Mukristu, ndinofanira kuva zvimwe chetezvo. Hareruya! Hongu, changamire. Kana ndiri Mukristu, zvino ndakaparidza Evhangeri uye ndikayambira kutongwa kwaiuya, ndiina Noa. Hongu, changamire. Ndakanga ndiri chikamu chazvo kumashure ikoko, imomo. Ndaive chikamu chehupfumi hwaMwari.

¹⁶³ Ndaive naMosesi pagwenzi raipfuta. Ndakadzingwa muEgipita pamwe naMosesi. Ndakatizira nemurenje, uye ndakanga ndinaye pagwenzi raipfuta. Ndakanza inzwi raVo. Ndikaona kubwinya kwaVo. Ndakaona Shongwe yeMoto uko mugwenzi iroro seri ikoko, ichitaura naMosesi.

¹⁶⁴ Ndakanga ndinaye paGungwa Dzvuku parakazaruka. Ndakaona Shongwe yeMoto ichigara paGomo reSinai. Ndakadya mana murenje uye ndikanwa kubva padombo rakarohwa. Hareruya! (Handisi kunzwa kuva nemakumi mashanu nemashanu zvino.) Ameni. Hongu, changamire. Ndakadya mana murenje, nevana vechiHebheru kumashure ikoko murenje. Uye ndakanwa kubva padombo riya rimwe chete rakarohwa.

¹⁶⁵ Ndakamira naJoshua mangwanani aye paakanga achitarisa masvingo eJeriko, ndokuona Murume akamira. Akavhomora munondo wake ndokumhanya kuti asangane naYe. Akati, “Uri wedu here. Uri pamwe nemuvengi wedu here?”

¹⁶⁶ Akati, “Ndini Mutungamiri wehondo yaJehovah.” Ndakaona Joshua achikandira munondo wake pasi. Ndakafugama naJoshua pandakagwadama pamberi paKe, Mutungamiri waJehovah wehondo yaKe. Ndakaona masvingo eJeriko achiwira pasi, pakuridzwa kwehwamanda.

¹⁶⁷ Ndakaona Joshua, akati, “Zuva, mira ipapo. Uye, iwe mwedzi, mira pamusoro peAjaroni. Usafamba.” Ndakaona zuva richimira ipapo, uye mwedzi uchiramba uchivhenekera chiedza chawo. Ndakaona zvese izvozvo zvichiitika.

¹⁶⁸ Ndakanga ndiina Dhanieri mugomba reshumba; nevana vechiHebheru muvira romoto.

¹⁶⁹ Ndakanga ndiina Eria, kunze uko apo nyika yose yakamuramba, naAhabhu nemaJezebheri avo ose nebvudzi ravo rose rakagerwa nezvinhu zvezuva iroro, pendi dzavo

nemapaudha, zvese zvakabata chechi. Ndakamira naEria, ndikati shoko harina chinosvibisa uye rakachena, paShoko raMwari. Hareruya! Ndakagara naye paGomo reKarmeri paakanga akamira ari ega kunze uko. Ndakamuona achinamatira kuti moto udzike kubva kudenga.

Ndaive naDhavhidhi paakauraya Goriyati. Mwari ngavarumbidzwe!

¹⁷⁰ Saka, kana ndiri Mukristu, ndinobatanidzwa mune zvese izvozvo. Ndinofanira kuva chikamu chazvo. Hongu, changamire.

Ndakaporofita pamwe naIsaya muzuva rake.

¹⁷¹ Ndakanga ndiina Johane paJorodhani paakaona njiva ichiburukira paAri. Ndakamira naJohane paJorodhani.

¹⁷² Ndakamuona achiporesa varwere; achimutsa Razaro; achimutsa mwanasikana waJairosi achidzoka kuhupenyu zvakare, mushure mekunge afa. Ndakazviona.

¹⁷³ Ndinobatanidzwa naYe murufu rwaKe. Ndakafa pamwe naYe paAkafa paKarivhari, uye ndakamuka zvakare mangwanani eEsta pamwe naYe, musimba rokumuka kwaKe. Ndiri chapupu chazvo manheru ano. Ndakafa pamwe naYe paKarivhari, ndikamuka pamwe naYe paEsta. Hareruya! Kuti ndive chikamu chaKe, ndinofanira kubatanidzwa naYe. Ndakabatanidzwa naYe murufu rwaKe. Ndakabatanidzwa naYe mukutambudzika kwaKe. Ndakabatanidzwa naYe apo masangano akaMuramba. Ndakabatanidzwa naYe pavakaMudzinga mutemberi, pavakaedza kukanda, yaMubvise. Ndaive naYe ipapo. Ndakanga ndinaYe murufu rwaKe, ndakamutswa pamwe chete naYe murumuko.

¹⁷⁴ Uye ndaive pamwe nevanezana nemakumi maviri pavakakwira muimba yepamusoro. Hongu, changamire. Ndakaona mhepo iya ine simba yaivhuvhuta ichibva Kudenga. Ndakataura nendimi nevazodziwa paZuva rePentekosti. Hareruya! Ndaivepo nekuti Ndakabatanidzwa naYe. Mwari ngavarumbidzwe! Ndizvozvo chaizvo. Ndakaparidza naPetro, muna Mabasa 2. Oo, ndakaparidza naye ikoko.

¹⁷⁵ Ndakaparidza naPauro paChikomo cheMars, pamberi pemutsoropodzi. Hongu, changamire. Ndaitofanira kuve ndakadaro.

¹⁷⁶ Ndakanga ndina Johane paChitsuwa chePatimosi. Ndakaona chiratidzo cheKuuya kwaKe. Ndiri. Nda—ndakaona Luther. Ndaive naye panguva yekuvandudzwa.

Ndaive naWesley.

¹⁷⁷ Uye zvino ndiri muno muYuma, Arizona. Hareruya! Ndinobatanidzwa manheru ano, muno muStardust Motel, neboka revanhu vanotenda zvimwe chetezvo. “Uye zvino takagara pamwe chete munzvimbo dzeKumatenga muna Kristu

Jesu.” Hareruya! Ndiri kutarisira Kuuya kwaKe mukubwinya, mamwe amazuva ano. Ndakabatanidzwa naYe!

Kurarama, Akandida; kufa, Akandiponesa;
Kuvigwa, Akatakurira zvivi zvangu kure-kure;
Kumuka, Akaruramisa pachena
nokusingaperi:
Rimwe zuva Ari kuuya—oo, zuva rinobwinya!

¹⁷⁸ Ndabatanidzwa zvino murubhabhatidzo rweMweya Mutsvene; kwete chimwe chinhu kunze kuno mumugwagwa, chimwe chinhu makore makumi mana akapfuura. Ndinako iko zvino, kubwinya nesimba raMwari, rokuregererwa kwezzvivi. NdinoMuona achiporesa vanorwara, achivhura maziso akapofomadzwa, ndinoMuona achifanotaura zvinhu, achiverenga mwoyo yevantu. Ndinobatanidzwa naYe mushumiro yaKe muzuva rino. Mwari ngavarumbidzwe! Ndinobatanidzwa naYe, murudzikinguro muzuva rino rokupedzisira. Ndinovimba kuva chikamu cheMwenga mukuru iwoyo uri kuuya mamwe emazuva ano.

¹⁷⁹ Zvisinei kuti nyika ingati kudii, vangatidana kuti “vanopenga, vane mamhepo, kana anaBherizebhabhu, kana vakatsauka pachitendero,” chero zvavanoda kuva. Ini ndichiri kuda kubatanidzwa neboka iroro. Ndichiri ipapo. Ndinoramba ndiri ipapo. Ndakazvarirwapo. Ndinoda kugara ipapo. Ndicharamba ndiri ipapo, nokuti Mwari vakandiisa ipapo. Ndiri. Ndakasiya chechi yangu, kuti ndiuye ndizvibatanidze neboka revaumburuki vatsvene. Ndiri mumwe wavo. Ndinobatanidzwa navo.

Vanoti, “Billy, warasika njere dzako.”

¹⁸⁰ Zvimwe ndakadaro, asi ndakawana pfungwa yaKristu. Ndakawana Shoko raKe, ndikawana Hupo hwaKe, ndikaona kuti ndiYe mumwe chete zuro, nhasi, nokusingaperi! ... hanyn'a kuti mumwe munhu anofungei nezvavzo. Ndini uyu. Ndini wacho ndinofanira kuita kubatanidzwa kwangu. Ndinobatanidzwa naYe, neShoko raMwari. Akati, “Zviratidzo izvi zvichatevera avo vanotenda.” Ndinofara kuti ndinobatanidzwa mazviri. Hongu, changamire.

¹⁸¹ Munoziva, muridzi wekare wevhayorini, imwe nguva, makanzwa nyaya yacho, vakanga vaine vhayorini yasakara ndokuiisa kuti itengeswe, vaida kuitengesa, zvino hapana aida kuitenga. Vakati, “Ndiani achapa dhora? Ndiani achapa dhora nehafu?” Kekupedzisira, “Yave kuenda kamwe, yave kuenda piri, nedhora nehafu.”

¹⁸² Pakupedzisira mumwe murume achenya bvudzi akabuda muungano. Munoziva nyaya yacho. Akaisimudza, akati, “Ndipei kuno.” Akaisa rozini pane chekuridzisa, ndokuiridza zvishoma. Vanhu vakatanga kuchema. Misodzi ikatanga kuyerera pazviso zvavo, saizvozvo.

¹⁸³ Zvino pavakadaro, mutengesi akasimudza zvakare, akati, “Ndiani achaita chimwe,” akati, “chiuru chemadhora, zviuru zviviri, zviuru zvishanu?”

¹⁸⁴ Mutsauko wakanga uri papi? Tenzi, uyo aiiziva, uyo akaivaka, aiziva maburitsirwo eizvo zvakanga zviri mairi.

¹⁸⁵ Uye chero bedzi tikaedza kuburitsa machechi edu kubva muzvitendwa nemasangano, hatife takazviita. Regai Tenzi Muvaki wevanhu, Akagadzira munhu nemufananidzo waKe iye, Ari kuMuvakira Mwenga nokuda kwechinhu chimwe chete, regai kuridza kwaKe kweMweya Mutsvene kurove Shoko iri mumoyo mako imwe nguva, zvino uchave muenzaniso wedu wakanakisa. Zvisinei kuti machechi makuru mangani aunoenda kwaari, uye kuti mazita mangani ari mubhuku, zvichaitira Jesu Kristu zvakawanda kupfuura machechi ese, nemasangano, nezvitendwa, nemachechi enyika, nemasangano, pasi rose.

¹⁸⁶ Vari kugadzira Mwenga. Hongu, changamire. Vari kuveza vachibvisa zvimedu zvino, kutema-tema vachibisa nyika. Oo, kujoinha chechi, nezvitendwa, nemasangano, nedzidziso, zvose zvinofanira kuchekwa zvichibviswa paChechi; pfungwa dzavo dzetsika, kusava nehany'n'a kwavo, dzidziso dzavo nezvinhu. Dzokai uye regai Tenzi vatore chekuridzisa. Regai Tenzi vakusimudzei mumaoko aVo, varove Shoko, voti, “Jesu Kristu mumwe chete zuro, nhasi, nokusingaperi.”

¹⁸⁷ Itai, “Ameni, Ishe. Ndiitei, ndiumbei, ndiitei, Ishe, zvandinofanira kuva.” Zvino pachava nechimwe chinhu chakasiyana.

¹⁸⁸ Zvino, “Kana Ndichinge ndasimudzwa kubva panyika, Ndichadhonzeru vanhu vose kwaNdiri.” Hongu, changamire.

¹⁸⁹ Vari kukucheka zvino, kukuchekerera kuva Shoko raVo chete, vachicheka zvitendwa zvose nedzidziso nezvinhu zvose, kure newe, kuedza kudzokera kuMwenga woMwanakomana, humwe humhizha, chikamu cheShoko. Shoko.

¹⁹⁰ Jesu haana kukwanisa kutora nzvimbo yacho. Munorangarira pavakaverenga zuva riya mubhuku? Akangoverenga bedzi chikamu chechiporofita, akasiya chimwe chacho kuitira mazuva okupedzisira. Tiri kufanira kutora chikamu ichocco.

¹⁹¹ Saka, munona, Vakacheka, vanoda kucheka vachibvisa Chechi, sezvaVakaita vachibvisa Mwanakomana, sezvaVakaita Mwenga neChikomba. Kuti uve Mwenga waKe, unofanira kuva chikamu chaKe. Kwete chikamu chechitendwa, kwete chikamu chechechi, kwete chikamu chesangano, asi chikamu chaKe. Kuvezwa kubva mune chero imwe mhando yechimiro, hazvishande. Unofanira kuvezwa kubva muShoko. Nyika yagurwa kubva pauri, uye pongosiiwa Shoko chete richigara mauri.

¹⁹² Muvezi mukuru ari kuvimba newe, uchida kumira uye ugozviita kuti uumbwe mumufananidzo wezvaAnoda izvo zvinodiwa neShoko raKe. "Mumazuva okupedzisira Ndichadurura Mweya waNgu pamusoro penyama yose. Vanakomana navanasikana venyu vachaporofita." Kristu ndiye Humhizha hwakaziviswa hweShoko rakaitwa nyama. Unokumbirwa kuti uvibatanidze maAri, neShoko rimwe chetero, kuti uve humhizha hweMwenga.

¹⁹³ Zvino, hama, Mwari vaive nehumhizha kareko, hwekuratidza kunyika, zvino Vanoda humhizha nhasi uno. Unoda here? Wagadzirira here, shamwari yangu yeChikristu? Une chokwadi chaicho here kuti hupenyu hwako huri kuratidza Kristu, zvisinei nezvinotaurwa nenyika. Vanoti, "Wakarasikirwa nenjere dzako. Wava kupenga. Wakaenda ukanojoinha boka riya revaumburuki vatsvene." Usatombozviteerera.

¹⁹⁴ Kana usina kuponeswa zvechokwadi chaizvo, uye muMutumbi iwoyo, uye Shoko raMwari riri mauri uye richiZviratidza, uye Hupenyu hwaKristu huchiratidza kubva mauri; hama, hanzvadzi, usarasikirwe nemukana iwoyo. Handina basa nezvauri, kuti imhandoi yezviitiko zvaunazvo, rega Shoko iroro rizviratidze kuburikidza nemauri zuva regarega, nokuti Mwari, mumazuva ano okupedzisira, vari kutorera Mwanakomana waVo Mwenga, Jesu Kristu.

Ngatikotamisei misoro yedu.

¹⁹⁵ Baba veKudenga vanodikanwa, maitiro akakwasharara zvakadaro pamberi peboka revanhu vakachenjera. Dzidzo yangu yakakwa...haina kukwana, Ishe. Ndinonamata kuti Mweya Mutsvene mukuru anyudze mashoko aya mumoyo yevanhu, kuti vaone zvandanga ndichireva, kana vanga vataadza kunzwisia nenziro yangu yekugura-gura zvinhu, Ishe. Asi, mumoyo mangu, ndi—ndiri kuona zvaMuri—zvaMuri kuedza kuita.

¹⁹⁶ Ndinotenda, Baba, Mwenga unofanira kuva chikamu cheChikomba. Unofanira kunge wakafanana neChikomba, nokuti iwo chikamu chaKe. Haumbokwanisi, zvachose kuva Mwenga waKe kusvikira wava chikamu chaKe. Uye ndicho chikamu cheShoko, nhasi, chinoti ndiYe mumwe chete zuro, nhasi, nokusingaperi.

¹⁹⁷ Tsanga yegorosi yakamborarama panyika, ndokuwira pasi, ikamuka iri mumufananidzo wetsanga yakapinda muvhlu. Uye, Ishe, neZuva rePentekosti kwakauya Chechi huru. Kwakauya imwe tsanga yegorosi, kuzoitwa Chikomba neMwenga vezuva rekupedzisira.

¹⁹⁸ Takaona, yakawira, kuitira Iye, kwechiuru chemakore. Kubva pakanzuru yeNicaea, yakarara ichiora muvhlu.

¹⁹⁹ Vatsoropodzi vakanyora bhuku, *Mwari Vakanyarara*, "Vairegedza kuti vana vaduku vafe, uye vauraiwe neshumba, uye vapiswe. Uye varwi vakauraya Makristu, nekuvapisira

pamatanda.” Dai murume iyeye aiva chete nekunzwisia kwepamweya!

²⁰⁰ Gorosi iroro rinofanira kuora muvhу, asi rakamera zvakare, kwete mumufananidzo warakapinda pasi riri. Rakadzika pasi riri mumufananidzo wetsanga yegorosi, asi, parakabuda, raiva nedzimwe tsuri, segorosi duku rino buda.

²⁰¹ Pakupedzisira rakakura, kubva kuna Luther kuenda kuna Zwingli, zvichienda zvichidzika, uye pakupedzisira rakasvika pakuva muchekechera. Rakazvishandura mumazuva a Wesley. Raitaridzika zvakawedzera zvishoma kunge gorosi, uye zvakanyanya kuita saro kupfuura zvaiita mashizha. Riri kudzoka kuva zvariri zvakare.

²⁰² Zvino tinoona kuti, rakabuda, tsanga, yakada kuita seiro chairo. Uye kana ukangodzika wozarura chikwande, unozoona. Tsanga yekutanga iya yegorosi haina tsanga mairi, zvachose. Chikwande, shizha. Ishe, rumutsiriro rukuru rwePentekosti rwakabuda, rwaifanira kuva saizvozvo, Ishe, kuchengetedza Gorosi parinozouya. Paisazova nenzvimbo yekuti Riende.

²⁰³ Zvino, Baba, tinoziva kuti tinotora zvinhu zvose nezvisikwa, nokuti Makaumba zvisikwa. Makadzikingura nyika: nenzira yamakaibhabhatidza nayo, mazuva aNoa, mushuremekuparidza kwake; Makadonhedzera Ropa reMwanakomana panyika, kuti Muichenesere iMi; uye muzera guru rinouya, mukuvandudzwa, Muchaipisa nemoto, kupisa zvinhu zvose zvenyika zvibve. SezvaMunoita kuMukristu, Munomuponesa: munomuhabhatidza; munomuchenesa; zvino movandudza nyika kubva kwaari, uye momutora ipapo seweNyу, nekuisa Mweya Mutsvene maari.

²⁰⁴ Tinoziva kuti gorosi iri rakauya nenzira imwe cheteyo. Chisikwa chose chinoshanda zvime chetezvo. Zvino, Ishe, kana tichiona chikwande zvino chichibva paTsanga, chichiita zvenyika, O Mwari, itai kuti tsanga idzodzo... Chi-chikwande chinofanira kubva, kuitira kuti tsanga igopinda muHupo hweMwanakomana. Ndinonzwa kuuya kwemuchina unokohwa, Ishe. Hazvizotora nguva refu. Zvino chinokwidza mudenga chikuru chichatakura mudenga Mwenga waKe mukubwinya, muHupo hwaMwari.

²⁰⁵ Ndinonamata, Baba, kuti Mugoropafadza mumwe nemumwe wedu. Ngatirangarirei, Ishe, kuti uyu ndiwo mukana wedu. Tinogona kusava nemamwe mangwana. Nhasi ndiwo mukana wedu. “Nhasi, mushure menguva refu kwazvo, paunonzwa Inzwi raKe, usaomesa moyo wako.” Ishe Mwari, handizivi vanhu ava. Kana paine chero mumwe pano, asina izvi, itai kuti manheru ano kuti vagamuchire huzaro hwaMwari, uye vazadzwe neMweya Mutsvene. Zviitei, Baba.

²⁰⁶ Zvino nemisoro yedu yakakotamiswa, mwoyo yedu yakakotamiswaho, zvakare. Shamwari, regereraiwo nzira yangu

yandagura mharidzo yangu. Ndi—ndinonamata kuti Mwari vachangokuratidzai zvandanga ndichireva. Zvino, kana... Handidi munhu anotarisa. Ingoramba wakakotamisa musoro wako. Handidaro. Chero zvauri, kana usina chokwadi chekuti hupenyu hwako... .

²⁰⁷ Zvino, munoona, chimwe nechimwe chematanho iwayo, chii chavakaita? Vakapinda musangano. Chii chaWakaita? Mweya wakabva ukaenda, kune mumwe. Luther paakangoita sangano; Wakanopinda muna Wesley chaimo. Wesley akaita sangano; Ukanopinda muPentekosti chaimo. Pentekosti yakaita sangano; Uri kuenda kupi? Sezvakangoita Shongwe yeMoto, unongoramba uchifamba.

²⁰⁸ Uye vamwe vanhu, vanoti, “Ndiri muPentekosti.” Zvakanaka. “Ndiri muLutherani.” Zvakanaka. Hapanza chekupikisa pazviri.

²⁰⁹ Asi, shamwari, shamwari, Gorosi richiri kufambira mberi. Takava nerwumwe rwerumutsiriro rwukurusa. Rwa—rwakagara kwenguva yakazoreba. Nhoroondo inoratidza kuti rumutsiriro rwunongotora kwemakore matatu chete. Urwu rwave nemakore gumi nemashanu, kana kudarika, mbuserere huru dzekukunamatira vanorwara, asi rwatonhora zvino. Tarirai! Rumutsiriro rwega-rwega nguva dzose rwunobuditsa sangano shure kwarwo. Ko sei urwu rwusina? Pane rimwe boka duku rehama rakantha kumusoro, kumusoro kuno kune imwe nzvimbo, rintonzi Latter Rain, hakuna kwavakaenda; zvakangodonha. Sei? Izera reGorosi, shamwari. IGorosi. Pane shumiro panyika yakangofanana neiyo yakapinda muvhuhu kumashure uko kumavambo, chitiko chaicho chepentekosti.

²¹⁰ Machechi ari kuita masangano. Uye imwe iri kuedza kuvaka huru kupfuura imwe, uye vowana dzimwezve nhengo dzakawanda nezvimbwe, masangano, zvishoma nezvishoma. Tinozviona. Ndiri mupentekosti. Tinochiona chichibva. Asi chii? Chinofanira kuita izvozvo, kuti mwa—Mwanakomana agone kusvika kuTsanga. Dai yainge isati yavapo, kutanga, dai painge pasina kuve nechikwande pairi, ingadai isina zvimbwe yokuenda. Mwari vakaiitira chikwande, munoona, sekoronni, segorosi, sechimwe chinhu chose chinobuda muchikoko. Zvino, munoona, hapanza kana sangano rakantha mushure meurwu. Sei? Hapasisina nguva yerimwe. Tava kumagumo.

²¹¹ Uye kana usiri chaipo paunofanira kunge uri, uye uchiti, “Hama Branham, kana Mwari vachinzwa munamato wenyu wevanorwara, uye ndanzwa zvakaitwa naIshe mukupindura munyengetero...” Uye wakanza nezvezvamwe vanhu vari munyika nhasi, vari kunamata. Unoti, “Ini... Mungandinamatirawo here, kuti ndigamuchire chitiko ichocco, Hama Branham? Ndinogona kusazokuonai zvakare.” Ndinogona kusazokuona. “Asi namatai kuti ndiveko. Handisi kunzwa

sekunge ndichange ndiriko zvino. Asi ndinoda kuti imi mundinyengeterere, kuti ndiveko.”

²¹² Zvino, musoro wose wakakotamiswa. Simudza ruoko rwako, ungadaro here? Ishe vakuropafadzei, vakuropafadzei, nemi. Mwari vakuropafadzei. Muboka iri revanhu, ndinofungidzira, maoko makumi mashanu, zvichida, kana makumi manomwe nemashanu anga akasimudzwa.

²¹³ Zvino, Jesu Vanodikanwa, Ndimi mutongi. Isu tinongori vashumiri. Ndinonamata, Mwari Vanodikanwa. Uye—uye kana ndawana nyasha pamberi peNy, pinduraiwo munyengetero wangu. Maona ruoko rwose rwasimudzwa. Munoziva zvanga zviri mumwoyo mavo. Tinotenda kuti vakagadzwa kuHupenyu. Uye Satani, sezvakangoita mumazuva aAdhamu, ari kuedza kudzivisa humhizha uhwu kuti husauye. Ngazvimiswe manheru ano. Dai Ropa raJesu Kristu razvivhara, uye dai vauya sehumhizha kuna Mwari. Zviitei, Baba.

²¹⁴ Dai vabatanidzwa muShoko raKristu. Akati, “Kunze kwekunge munhu aberekwe patsva...” Dai vagamuchira chiitiko ichocco chekuzvarwa patsva. Dai vakagamuchira rubhabhatidzo rweMweya Mutsvene, kugadziriswa kwezvinhu zvose zvenyika. Havachazvida zvachose, Ishe. Sukai nyika iyoy kubva pavari, uye movabuditsa sehumhizha pamberi pevanhu. Zviitei, Ishe, kuti Muve nemufaro muzera rino renguva yebindu mumazuva ekupedzisira pano, kuti muratidze humhizha hweNy, hwevarume nevakadzi ava, vakomana nevasikana, vasimudza ruoko rwavo. Zviitei, Ishe.

²¹⁵ Ropafadzai rumutsiriro urwu rwuri kuitika muguta. O Mwari, ndinonamata kuti murume nemukadzi wese, ari pedyo munharaunda, agoshanyira rumutsiriro urwu. Uye dai mumwe nomumwe wavo azadzwa noMweya Mutsvene, uye dai pakava nerumutsiriro rwechinyakare rwutsvaire nemuguta diki iri pano, kusvikira vanhu vanobva kwese-kwese vanouya. Zviitei, Ishe. Tipei zvinhu izvi, Baba, nokuti tinozvikumbira muZita raJesu. Ameni.

²¹⁶ NdinoMuda. NdinoMuda. UnoMuda here? Munoziva, Pauro akati, “Kana ndikaimba, ndinoimba muMweya.” Handizive hangu. Ndiri kure kwazvo nekuva muimbi. Asi handingozive, pamwe chete, kana tingasakwanisa kutanga rwiyo rwuya, NdinoMuda. Mungatipe kiyi here, hanzvadzi? “Nekuti Akatanga kundida.” Makarunzwa. Vangani vanorwuziva? Tione rako... Ndirwo rumwe rwenziyo dzangu dzekare. Ndinofarira kurwuimba. Zvakanaka.

²¹⁷ Zvino ngatingokotamisi misoro yedu uye tovhara maziso edu, toimba zvino, NdinoMuda.

NdinoMuda, ndinoMuda
 Nokuti Akatanga kundida
 Ndokutenga ruponeso rwangu
 Pamuti weKarivhari.

²¹⁸ Ngatirwuimbei mahon'era. Rimwe zuva miraraungu ichatsvaira denga. Pachava nekurira kwehwamanda. Vakafa muna Kristu vachange vachimuka. Oo, tichaZvida sei ipapo!

Ndokutenga ruponeso rwangu
 PaKarivhari.

²¹⁹ Ndipo apo paAkava Humhizha hwedu.

²²⁰ Ingorangarirai, humhizha hwese, husati hwamboiswa muhoro yemukurumbira, hunofanira kupinda nemuhoro yavo yevatsoropodzi, kutanga. Vatsoropodzi vanofanira kuona kana vachigona kuhutsoropodza. Asi kana hukagona kumira pakati pevatsoropodzi, zvino hunozoendeswa kuhoro yemukurumbira. Mwanakomana waMwari akapfuura nemuvatsoropodzi vemuhuromga hwose, sangano rose, kunyangwe kusvikira Pirato ati, "Handina mhosva yandinoona maari." Judhasi akati, "Ndakatengesa Ropa risina mhosva."

²²¹ Ndokubva Mwari vaMumutsa, zvino Akarembera muhoro huru yemukurumbira nhasi, ari kuruoko rwerudyi rwaMwari, achireverera. Haudi here kubatana naYe ipapo? Haudi here kuva chikamu cheizvozvo? Unogona kuva. Unokokwa kuti uve. Apo tiri kuimba rwiyo urwu, wadii wangotaurirana naYe zvino.

...kutanga kundida
 Ndokutenga ruponeso rwangu
 Pamuti weKarivhari.

²²² Tichiri kurwuimba zvakare, ndinoda kuti mukwazisane maoko nemumwe munhu ari kune rimwe divi retafura kubva pamuri zvino. Iti, "Mwari vakuropafadze, shamwari yeChikristu. Mwari vakuropafadzei. Ndinyengetererereiwo." Mumwe nemumwe wenyu ngaite izvozvo zvino, patiri kurwuimba zvakare.

Ndinoda... (Ndinamatireiwo.
 Ndinamatireiwo.)...kuMuda
 Nokuti Iye...

²²³ Ndzvozvo, kwazisanai maoko, uti, "Ndinamatirewo." Imi mose ndinamatireiwo. Ndinoda kuvako, zvakanyanyisa.

Ndokutenga ruponeso rwangu
 Pamuti weKarivhari.

²²⁴ Zvino ngatikotamisei misoro yedu tigovhara maziso edu, uye tosimudza maoko edu torwuimbira kwaAri zvino.

Ini... (O Mwari!) NdinoMuda
 Nokuti Akatanga kundida
 Ndokutenga ruponeso rwangu
 PaKarivhari.

Tarisai Humhizha hwenyu hwakarembera apo.

²²⁵ Muvezi Mukuru, Mwari mukuru Akasika munhu, akamuumba nekumugadzira mumufananidzo weNyu pachenyu, NdinoKukumbirai, Ishe, kuti Mugotitora manheru ano. Dai huno hwava husiku hwerangaridzo, rangaridzo yemazvirokwazvo kwatiri, kuti, manheru ano, Ishe, manheru ano, imo muno muStardust Motel, dai Maumba varume vave mumufananidzo wewanakomana vaMwari. Zviitei, Ishe. Muvezi Mukuru, ndiMi Moga munogona kuzviita. Torai Shoko reNyu, Ishe, Riumbei chaimo mumwoyo yedu tose, kuti tive humhizha hweNyu mumazuva okupedzisira, uye tigodaidzwa kunzi Mwenga waKristu. Vamwe varume vazoona kuti kune mazvirokawazvo akadaro uye nomufaro wakadaro mukuMuraramira.

²²⁶ Ishe, zuva rino, kuti kunyangwe machechi edu, ari kurasakiwa nekuperera kwawo. Havadarо... Zvinoita sokunge, zvese zvangova Hollywood, Ishe, chii chaitika? Vakatevera chi—chinovaima pachinzvimbo pechinobwinya. Tinoziva kuti nyika inovaima nezvenyika. Asi Vhangeri rinobwinya nerudo uye naKristu. Zviitei, Ishe, kuti tibve pakuvaima kwenyika, uye tigopinda mukubwinya kwaKristu.

²²⁷ NdeveNyu, Ishe. Makavatenga. Imi... Vasimudza ruoko rwavo, manheru ano, vanga vachida kuve vari. Zvino, Baba, ini... Dai ndaigona, ndaizovaita izvozvo, asi handikwanise. Asi ndiri kuvimba neMi. Makati, "Uyo anouya kwaNdiri haNdingatongomurasiri kunze. Uyo anonzwa Shoko raNgu uye achitenda kuna iYe akaNditura, ane Hupenuy husingaperi, uye haazopindi muKutongwa," kwete kutenda kwekabanga zvino, Ishe, asi kutenda kuti, "abva murufu achienda kuHupenuy." Zviitei, Baba. NdeveNyu, kubudikidza nemuZita raJesu Kristu. Ameni.

²²⁸ UnoMuda here? HaAshamisi here?

²²⁹ Tipei kachuni kadiki, kana kodhi ipapo, hanzvadzi, *Anoshamisa, Shamisa*.

Munofarira kuimba here? Ndiri kutora nguva yakareba here?

²³⁰ Ndinofarira kunamata. Hamudiwo here? Mharidzo diki, inocheka sevizvzi, handidaro... Munoziva, ndinovenga kucheka. Asi, iwe, unofanira kurovera chipikiri wochihbendesa kwachabudikira, kuchiita kuti chibate. Munoziva zvandiri kureva. Hongu. Unofanirwa kunyatsochikomerera pasi zvino. Uye maona?

²³¹ Munoda here rwiyo rwuya? "Anoshamisa, shamisa, Jesu kwandiri." Munorwuziva here?

Anoshamisa, shamisa, Jesu kwandiri,
 Gurukota, Muchinda weRugare, ndiYe Mwari
 Samasimba;
 Achindiponesa, nokundichengetedza kubva
 kune chose chivi nokunyadziswa,
 Anoshamisa Mudzikinuri wangu, rumbidzai
 Zita raKe!
 Ndagamborasika, zvino ndawanikwa,
 ndasunungurwa kubva pakupomerwa,
 Jesu anopa rusununguko neruponeso ruzere;
 Achindiponesa, nokundichengetedza kubva
 kune chose chivi nokunyadziswa,
 Anoshamisa Mudzikinuri wangu, rumbidzai
 Zita raKe!

Munhu wose!

Anoshamisa, shamisa, Jesu kwandiri,
 Gurukota, Muchinda weRugare, ndiYe Mwari
 Samasimba;
 Achindiponesa, nokundichengetedza kubva
 kune chose chivi nokunyadziswa,
 Anoshamisa Mudzikinuri wangu, rumbidzai
 Zita raKe!

²³² Zvino ngatitii, “Ishe ngaVarumbidzwe!” “Ishe ngaVarumbidzwe!” Hausi kunzwa kucheneswa here? Unonzwa zvakanaka here? Namata Ishe. Anoshamisa.

²³³ Mwari vakuropafadzei kusvika ndasangana zvakare. Ndichadzorera shumiro zvino kuhama, mutungamiri.



HUMHIZHA HWAMWARI HWAKAZIVISWA SHO64-1205
(The Identified Masterpiece Of God)

Mharidzo iyi neHama William Marrion Branham, yakaparidzwa kwokutanga neChirungu Mugovera manheru, Zvita 5, 1964, pamabiko eFull Gospel Business Men's Fellowship International paStardust Motel muYuma, Arizona, U.S.A., yakazotorwa kubva patepi yakarhekodwa ndokuzodhindhwa muChirungu pasina chakamurwa. Kuturikirwa uku muchiShona kwakazodhindhwa nokugoverwa neve Voice Of God Recordings.

SHONA

©2022 VGR, ALL RIGHTS RESERVED

VOICE OF GOD RECORDINGS, ZIMBABWE OFFICE
8 ST. ANNES ROAD, AVONDALE, HARARE, ZIMBABWE

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Chiziviso chekodzero

Kodzero dzose dzakachengetedzwa. Bhuku iri rinokwanisa kudhindhwapi papirinda yekumba kuti ushandise uri iwe pachako kana kugovera kunze, usingatengesi, semudziyo wekuparatzira Evhangeri yaJesu Kristu. Bhuku iri harigoni kutengeswa, kudhindhwapi akawanda, kuiswa pawebhusaiti, kana kuwana mumuchina waringachengeterwa, kuturikirwa mune mimwe mitauro, kana kushandiswa kukumbira mari pasina mvumo yakanyorwa nevekuVoice Of God Recordings®.

Kuwana umwe umboo kana zvimbewo zviripo zvingawanikwa, tapota nyorerai:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org